

宋學士全集 一六



貴州省圖書館
中文書書



宋學士全集

(六十)

J
17.8
1.2125

宋 濂 撰

宋學士全集卷之二十九

辭凡三十
八章

思嫩人辭

吾鄉呂成公實接中原文獻之傳。公歿始餘百年。而其學殆絕。濂竊病之。然公之所學。弗畔於孔子之道者也。欲學孔子。當必自公始。此生乎公之鄉者。所宜深省也。嗟夫。公骨雖朽。公所著之書猶存。古之君子。有曠百世而相感者。況與公相去。又如此之甚。近乎。聞而知之。蓋必有其人矣。託物引類。作思嫩人辭。辭曰。

惟嫩人之惜嫩兮。賦姱質於自然。修蛾規而凝黛兮。曼目轉以成聯。安鬢髮而如雲兮。歷輔巧以承權。纖腰秀頸若鮮卑兮。容都曼而體便娟。寶璐縈而右繞兮。桂微嬾以半侷。懸明月以綴佩兮。錯木難而傅冠。向瑤臺而徵步兮。意愴靜以貞閒。宓妃之倫折芳馨以相遺兮。復容與乎江干。勢翩翩其襄舉兮。若游龍之在淵。胡人閒不可以久留兮。逐凌厲乎高寒。馮道紀以爲御兮。鍊天和而爲餐。徑驅馭於陽陰兮。時上下乎星辰。款予生之何晚兮。不一覲於芳儀。念姱嬾之鮮雙兮。邈迴颺而曾思。欲愁悴而委情兮。氣涓澗以如炊。道苟可以遡之兮。視萬里猶門墀。登巖嶽而騁望兮。正晨旭之蒼涼。氣曠豁而闡朗兮。莽山川之縱橫。樹輪盤糾而柴僂兮。蘋草蒼靡以相望。豐狐思羣而永嘯兮。文鶴慕類以徐翔。企精爽之不徠兮。空

雲龍之將將。蹇侘僚而望絕兮。燿靈習其西藏。降崇丘而臨曠野兮。循故轍以東歸。向闌楯而徙倚兮。境外嬰而愁內滋。新蟾皎以出天兮。想纖美之曲眉。繁星爛而成文兮。懷繡帔之陸離。蒼灑灑落而無滓兮。思玉體之弗緇。拂蘭袖而起步兮。復經緯乎空庭。苦鴻鴈之靡靡兮。厭羽蟲之薨薨。撼戶橫以悲惻兮。惕厭容而弗自勝。轉曲牖而入堂壇兮。辟獨坐對乎華鐙。鐙影搖曳如鳥旛兮。象中心之靡寧。寒厖狺狺而思競吠兮。耳恍聞於登音。疾倒屣以啓關兮。飈鬪葉於枯岑。縹綿綿而莫抒兮。託幽寄於瑤琴。琴聲咽而思深兮。類孤鶴之鳴陰。更寂莫以將闌兮。斗杓旋而向東。舒枕衾而就榻兮。期夢寐以潛通。精氣注以弗釋兮。橋有物而衡中。息纒纒以方微兮。魂翕翕而上征。造旬始而謁太儀兮。羣靈續其若叢。氛旄溶以隨森兮。鳳旂沛而嬰空。馭象車而秉虬節兮。鞭列缺以斥豐隆。豹羆熊幡聿皇以奮兮。穆流紆譎鬱以相蒙。左攜右衛動以綳環兮。倏腴情溷雲滂而雷春。回穴幡纒汨以焄歔兮。吸噀瀟率藹以蒙鴻。穆眇眇以前邁兮。翩粉粉而弗止。莽冥冥以無垠兮。勢皇皇而迤靡。超氛埃而淑郵兮。竟按轡乎朱陵。長麗舉噶以向日兮。有赫戲之華文。揚芒燦以上森兮。粲重離之丹門。炫赤玉之寶章兮。列八龍之威神。欻東趨於蒼極兮。青瑁紛其並迎。羣神衍衍以方饗兮。奏靈和之鳳笙。四酎芬而凍飲兮。暈玉色而帶頰。揖素威以升皓宮兮。盼四極之浮浮。蔚收顧余而破顏兮。錫鑣瓊之華鉤。謂貞白以自守兮。合左契於伊周。折寒門而燭元冥兮。朔颼颼以吹裘。有夫黃巾而擐甲兮。握靈蛇以爲驅。重陰沍而未啓兮。肅紫氛之幽幽。四方非不可居兮。悵所思之莫余都。馳兩轂如飛丸兮。又滔滔而遐逝。靈氛告余以吉故兮。子何爲兮獨悲。若彼中天

之有居兮。隔人世之風雨。吾將導子之一至兮。庶弗愆於恆素。惛忽荒以從之兮。駕剛隨以徑度。芻光炎
之忻忻兮。緇纒鬱決而不可正視。瑊瑳形楹屹以上起兮。瀏濫弘恂雲謠而波詭。連卷櫺僊杳以軋芴兮。
歲魁幼眇蟲以高峙。中洞房之沕穆兮。乃媿人之攸居。使曼姬爲予通訊兮。儼再拜乎堂垂。芻朱扉之洞
開兮。移玉趾之委蛇。珠明玉潔不足以爲喻兮。光照耀乎東西。吐芳辭以若蘭兮。意勤勤而告余。曰皇降
靈兮。昭質弗沫。毋染爾穢兮。味厥施。紉葯襦兮。曳莖旃。結蕙纒兮。張椒幃。勺桂漿兮。嚙蓀糜。索胡繩兮。哇
揭車。集衆芳以遠蒸兮。羌郁郁而斐斐。余俯首而敬聽兮。書鞶紳以自規。海色動而報曙兮。陶去幽而開
寤。雖嘉辭之盈耳兮。邈若人其何處。遂捫膺以沈思兮。顛獨處而繚戾也。誠因言以會心兮。將神交於千
載也。亘天地而無初終兮。惟我民之秉彝。道弘敷於上下兮。必有人而繫之。往者固不可作兮。幸方冊之
昭如。日參驗於厥躬兮。若面命而耳提。跛鼈之嬰嫻兮。固難齊於六驥。能莘莘而弗怠兮。亦千里之可至。
余雖質難而力單兮。敢不沾沾而奮厲。帶鈞矩而佩衡兮。撤葑蒙而祛尉。期有形以必踐兮。始俯仰而無
媿。縱不得媿人以與之游兮。又何異同功而並世。

青山辭

予既爲此辭。嘗錄一通寄王子充。子充蓋有志同。予學呂者。嘗以識之。庸俟異日各考其學之成也。

青山崔崔。白雲溶溶。我疑其中。仙人所宮。風馬雲輿。霓旌羽幢。游行太空。翩然相從。望而不見。使我心忡。
我本金華。牧羊之童。口誦藥笈。有聲如鍾。震撼岩壑。無礙不通。謫居下土。黃塵濛濛。五色之文。布滿西東。
秋高露清。陟彼危峯。呼吸元氣。精神內融。嘯傲萬物。後天而終。

雲中辭

黃巖有奇士曰許君嗣。其字廷輔。治周易。煜然以文名。會天下紛擾。輒被鐵衣。操蛇矛。集兵以禦寇。尤能挽強命中。乘初弗信。君設正鵠一百八十步外。挾弓矢以往。轟然一發。輒中之。乃皆歎服。由是多驅馳戎馬閒。及天兵取台州。四方次第平。大興文治。建科目以取士。君慨然曰。聖天子在上。可以出而仕矣。起應書鄉闈。遂取浙江第二名。君文解。去通判沔陽府。剴煩劇如庖丁解牛。恢恢乎投刃而有餘地。已而復慨然曰。予家之東有委羽山。其高摩天。委羽之下。又有桃山焉。羣峯相與回環。日未出常有雲氣起。其閒縹緲。輕盈如兜羅綿。籠罩崖谷。如翔如舞。絕可愛玩。有時下覆欄宇。覺此身飄然在雲之中。恍欲逐黃鶴仙人。吹簫而往來也。第以君恩未報。不敢決去。他時髮種種。當掛冠而歸。與雲爲朋。姑以雲中生自號。蓋以表其志云。夫雲之爲物。出乎太虛。欸然而有。忽然而無。其變幻有不可測者。當長空晴妍。紆徐其輿。結而爲祥鸞。散而爲綺霞。其文采郁如也。及其黼黻鬱勃。鐵馬長驅。雷電爲之恍惚。而甘霖注焉。嗚呼。雲哉。何其有類於君也。然非雲之類君。實君有取於雲也。樂繁華者。贈勺藥以相娛。務高潔者。貯秋菊以爲糧。物何嘗有心。而人自強同之爾。予方與君談雲中之趣。君忽昂然而來。顧予言曰。彌知誦子之文久矣。豈爲賦雲中辭乎。予聞君襟韻洒落。得喪一歸於天。故其顏四時無憂色。其號爲雲中也。亦宜爲之辭曰。委羽之山兮雲薄之。勢輪囷兮復巒嵯。膚寸而合兮。既合而復離。不崇朝兮雨渺瀰。渺瀰兮雲之歸。玄功泯泯兮。邈難知。嗟爾雲中之人兮。胡不爾思。或出兮。或處兮。恆與雲以相期。

協晨中寥辭一首

鬼谷仙人畫列禦寇御風圖。以獻其師四十二代天師真人。真人號沖虛子。而唐封禦寇之號。實曰沖虛。此其圖之所以作歟。濂竊觀之。髯松奮張。有風泠泠然起於其中。霞光發舒。閃爍無定。禦寇方乘鸞回旋。龍裳鸞帶。凌亂不可止。遙見神山隱起大瀛海上。旭日一點如火。海濤噴薄迎之。濺沫而舞珠。景物遼曠。令人情塵銷實。直超鴻濛閒。嗚呼。仙人之畫奇絕矣。蓋以媿真人。非果在於禦寇也。真人或飛神。上謁太清。排空馭氣。靡所不之。將真人之似禦寇乎。抑禦寇之同真人乎。是未可知也。濂因造協晨中寥辭一篇。真人或咏於淵精之區。九都衆真。當有彈八瓊太瓊來和之者。庶幾後天而終。可以凋三光者乎。至若禦寇寓言旬有五日而後反者。微旨已備見其書。茲可略云。辭曰。帝青洞真陽太廳恆鬱敷。凝神歛上。征行與灑氣俱。飛輪入溟洋。九光開翠萼。腰佩白琥囊。吻薦紫琳腴。曲龍有丈人。持節下明都。咬以八辰祕。攝御萬象初。陟彼方文臺。大招許瓊暉。廓落黃演炁。陽堂明梵樞。開明戊己功。幽契曲晨機。羲娥俯倒景。流光駐熙夷。靈集動千載。視之若斯須。稽首方諸君。同餐燕胎芝。請授長生籙。浩劫以爲期。

予老矣。諸書皆忘去。此卷雖久留齋中。不克題就。今日退朝稍早。逍遙禁林。涼颺飄飄然吹衣。神情爽朗。有若憑虛而行歌天上。遂濡毫賦此。他日煉丹仙華山中。九轉成功。當與沖虛神游八極。握手一笑。何翅三千年也。

碧崖亭辭

濂與太常卿魏觀先生游甚久。知其爲孝敬之人也。先生閒嘗來謂濂曰。予家鄂之蒲圻。蒲圻有山。曰蒲首焉。曉然而起。如雲旂翠蕤。蕩靡空濛閒。對峙雙石。直上如笋。中敞碧崖。千尋嘉卉靈草。雜被之。粉紅駭綠。儼如圖畫中。我先人愛玩而不忘。日支筇步其下。或濯纓湖底。或咏詩坐盤石上。或望雲出沒崖谷。悠然而忘返。遂因以碧崖自號。時移事遷。層崖絕壁。雖蒼然不改於舊。而先人則追逐羣仙於風馬雲輿中。弗能一見之。予每過其下。不覺潸然出涕。故於宦游所至。揭碧崖之名於楣閒。所以志之。志之所以思夫親也。雖然。名之固寓也。而言之則尤寓也。曷若親履其地。而求先人之遺跡乎。當今聖人在上方。以孝治天下。他日幸遂歸田之請。築亭山麓。仍以碧崖名之。當風日清美。與二三子游其閒。指而言曰。彼清泉瀏瀏而斜出者。此先人濯纓之處也。磐石纍纍而可坐者。此先人咏詩之地也。崖谷沈沈。靈氣之宣通者。此先人望雲出沒之所也。一俯一仰。無非精神之參會。非惟慰其遐思。抑將藉是以勵夫所學。期克肖乎先人。予雖耄矣。此心不敢忘。子幸爲辭。刻諸亭上。何如。濂曰。傳有之。舜食則見。堯於羹。坐則見。堯於牆。古之上聖猶若斯。況下於此者乎。人子之於親。遇事觸物。無有不可感勵者。況親之昔日所游歷者乎。斯亭之建。當與甄氏思亭並稱。其視崇臺芳榭。以騁游觀之娛者。果何如也。若先生者。豈不爲孝敬之人哉。先生字杞山。觀其名也。學問富而德行修。踐揚中外。其善政蓋章章云。辭曰。

崖之雲兮。英英其升。崖之木兮。欣欣其榮。恨仙人兮。何之。颺風薄而上征。豈降精而委祉兮。發爲休徵。三秀之苗兮。膏露之凝。渺長思於無窮兮。視一息於千齡。金可銷而石可泐兮。又焉能爽吾之精誠。

著存軒辭序并

瑞安裘中季。以學行推舉。典簿成均。扁其軒居曰著存。不忘乎親也。御史中丞劉君伯溫。嘗爲賦詩以寫其情。予復師伯溫之意。演爲琴操三解。使季和。援琴而鼓之。琴悲而不成聲。聲信不能成也。嗚呼。孝子之思親。果有終極否乎。其辭曰。

人孰無親兮。我親歸於黃土。六合之間兮。莫過我最苦。風獵獵兮成音。雲族興兮晝陰。我親何在兮涕泗霑襟。

我親雖死兮。我心不死。開目則見兮。威儀孔邇。何俟當祭兮。始如見之。彼蒼者天兮。悠悠我思。

求親冥茫兮。曷求於身。我身卽親兮。一體之分。戰兢保持兮。厥德常新。毫髮不敢愆兮。懼傷乎親。上慎旃哉兮。此謂著存。

孤憤辭

中州人士有無罪而被廢斥者。識與不識咸冤之。濂因本其志爲著孤憤之辭。使世之用法不慎者讀焉。其或知所懼也。夫辭曰。

哀予生之匪淑兮。耿鬱紆其誰語。恐此心之難白兮。假微詞以自吐。曩有志乎學古兮。指前修以作則。非秋蘭奚敢紉兮。非申椒吾焉食。仗所履之正直兮。謂無施而不可。悲世塗之嶮巖兮。矧獨中茲危禍。胡萋斐之小文兮。竟成之於貝錦。剛指方以爲圓兮。揆人情爲已甚。伊翩翩之公子兮。余素得而友之。握手以

示肺肝兮。若斷金而弗疑。何中心之多變兮。一旋踵而弗予識。既擠予於坑穽兮。復彎弓而下石。汝面目之無怍兮。曾何謀之弗深。縱禍予其曷傷兮。吾懼戕汝之良心。觀日月之光昭兮。聞雷霆之隱耿。予固不足畏兮。汝寧不畏於天。天道微而難索兮。斯焉足以責汝。彼黃鳥之嚶嚶兮。猶求友而弗止。將七尺之美軀兮。乃一禽之不如。予固約結而罔措兮。又爲汝而歎歎。嗟受命之蹇。僅兮。豈獨汝之爲尤。蛟龍鬪於深淵兮。寧無損於鱗。汝雖不我陷兮。予安往而逃囚。唯飲泣而無所訴兮。傷予罪之不當。蒼天之至明兮。獨不鑑我之幽枉。良切皎皎之白璧兮。僉管其爲燕石也。織織之素縞兮。反謂其如玄漆也。欲力詆以深文兮。其奚患於無辭。咎繇之不吾出兮。眼有淚而誰知。誓剖心以自明兮。念父母之所遺。苟雉經於溝瀆兮。慮君子之見嗤。夜漫漫而不旦兮。悲風颯其四來。秋蟲響於空塔兮。似助予之悲哀。六合之至廣兮。真一身而無所。魂怳怳若有忘兮。雖生存而如死。昔公冶之所遭兮。夫何有於不仁。在縲紲而非罪兮。亦魯叟之所稱。果自反而弗疚兮。縱遇辱其如榮。浮雲過而日潔兮。春冰釋而水清。外累不足以爲懼兮。懼吾德之未明。意欣欣以超絕兮。振冠纓而起行。取瑤琴以彈之兮。有和衍之新聲。樂天命以自度兮。究年歲而不再更。

李都尉字辭

皇上卽位之九年。以順德公主下嫁於太師李韓公之子駙馬都尉祺。初祺小字爲總。至是詔曰。其易以美名。翰林諸臣乃定今名以進。且字之曰子祺。既而子祺請曰。祺之名實定於先生。祺於先生少嘗受業。

有師弟子義。將何以教之。余惟一代之興。必有元勳厚德之人。出於其閒。始則佐帷幄。決勝負。終則坐廟堂。而贊治化。成大功。而享榮名。爲國家之柱石。係天下之重輕。若漢之蕭鄴侯。宋之趙韓王。皆若是矣。至於連姻帝室。若今太師。則未之有也。今太師極人臣之尊。爲上公之貴。而都尉子祺。獨能好學。慎行。敦厚。下人。發爲篇章。動有意趣。是。可謂富貴而好禮。又難能也。祺之爲義。爲祥。爲吉。子祺固有以致之矣。爲字實宜。雖然。尙父有云。敬勝怠者吉。此守位之事也。敢以爲勉焉。辭曰。

氣合運凝。天地載清。君聖臣明。以階治平。惟臣謂誰。實時元老。運籌建略。致天之討。四方旣帖。乃戢干戈。執政廟堂。如漢蕭何。匪惟執政。昨以大國丹書金券。俾首百辟。爵則崇侯。職則太師。左右天子。以鎮藩維。藩維旣安。君臣交歡。上降下承。煥乎榮觀。彬彬都尉。大寵是膺。太師之子。天子之甥。際茲風雲。依彼日月。侃侃都尉。不自矜伐。文駟錦衣。其儀孔都。出入金門。不敢笑譁。躑躑公子。交趨競諾。都尉□□。屹如山嶽。斯時之人。以恩爲祥。祥則旣多。惟敬乃將。都尉之名。曰祺。是命。何以承之。告爾克敬。庶民不敬。且潰乃家。況茲世臣。不敬謂何。凡人有身。咸有嗜欲。敬以攝之。形莊氣肅。自身而推。孝親尊君。動無弗敬。乃有譽聞。敬勝者吉。古有弘訓。敬以承祺。萬福咸順。爾克敬矣。罔弗盛矣。爾之祺矣。罔爾違矣。太師之勛。山崇川長。敬哉勿忘。以繼耿光。

馮擇善都督字辭

自昔帝王啓跡之地。天必儲精聚靈。使英雄謀略之士。生乎其閒。以備其驅策。而佐其設施。及大業旣定。

爵號之隆冠於當世。褒寵之澤流於子孫。若漢唐之豐沛。晉陽。君臣同休。蓋蔚乎其盛矣。今上皇帝龍飛江淮。光啓神祚。於時文武才俊。膺揚虎躍。或秉鉞出征。或執筆帷幄。率多江淮之人。論功剖符。公國侯郡者。以數十計。若郢國馮公其一也。郢公定遠人。初從上爲帳前總制親軍都指揮使。立功草昧時。不幸早卒。及上卽位。追爵爲公。命其子誠侍青宮。執業讀書。及誠旣冠。三擢遂僉大都督府事。而誠之季父初襲郢公職。累建大勳。亦啓封宋國。一門二公。誠又位在樞府。敏事慎職。爲上信任。天下榮之。誠篤好問學。能爲詩章。以嘗受學於予。閒來請曰。誠之字曰擇善。未達其義。願有以教之。乃爲之辭曰。

江淮之閒。眞主生焉。乘風附雲。實惟英賢。侃侃郢公。熊虎之姿。大劍良弓。指麾義師。孰與其才。不賦以壽。騏驥萬里。償於中道。壽雖不延。有弟克膺。有子克承。以宏厥聲。烈烈宋公。爲郢公弟。惟都督誠。又克爲子。爲他人子。名實易稱。保國承家。厥惟難能。上則天君。下有衆庶。苟弗以誠。曷以宅位。惟誠之德。貫通於天。何感弗應。何鬱弗宣。天以至誠。庶物乃育。三光無愆。四序靡瀆。苟或不誠。宜暑而寒。人其怨嗟。歲功斯廢。況我伊人。不誠其可。矧爾世臣。爵祿是荷。爾或不誠。民胥爾尤。誠而無擇。爲僻爲謬。古訓孔多。維人攸踐。我將曷從。維擇其善。惟忠與孝。則允蹈之。維悖維惡。絕而弗爲。蹈之匪艱。服以悠久。木升川增。山立海受。旣擇衆善。乃立爾誠。乃保厥家。乃篤鴻慶。以之事君。爲臣之良。以之立身。爲邦之光。匪光於邦。丕爾先人。郢公有子。聖主有臣。

張孟兼字辭序并

國子錄張君生於歲戊寅正月六日。以歷推之。是月九日始入春。則中氣猶居丁丑年之冬。其大父府君因以丁命名。張君既長。聞人先生字曰孟兼。兼者何。謂臨二歲之中也。夫丁在十母爲火。戊則土也。火爲文明之侯。非不煜然有光。必變而爲土。然後生物之功遂。張君以辭章名世。今將刊其華而食其實乎。雖然。丁離象也。戊坤象也。離上而坤下。於卦爲晉。象有之。明出地上。順而麗乎離。明柔進而上行。張君又將自此而升乎。方今聖人御世。治具畢舉。張君益昭其明德。發爲人文。以黼黻王度。物有不資其成者乎。是則兼之之義已。或謂殷人尙質。多以十幹名。其與府君之意。則復然殊也。張君浦陽人。有學行。與濂爲同門朋。辭曰。

戊爲子。丁爲父。火得爲土。百物之所祖。能兼之道爲伍。

趙廣字辭

浦汭趙志道氏。衣冠之望族也。有子曰廣。來求予爲之字。予謂廣之文從广。從黃。广則因厂爲屋。象對刺高屋之形。而黃則諧聲也。許慎以屋之大者爲廣。實有容受之義焉。請以子容字之。何如。志道曰。善矣。乃爲之辭曰。

人之隘也。爾則廣之。人之拒也。爾則容之。惟廣惟容。吾將見爾德之豐。

鄭仲昭字辭

詩云。倬彼雲漢。昭回於天。說者謂雲漢。天河也。夜晴則天河明。其光隨天而轉也。雲漢然矣。揆於心之靈。

明其有弗同者乎。予友浦納鄭君，以漢爲名，內翰柳先生字之曰仲昭。閒來徵予言，予聞制字必有祝，於是稽諸詩義而補之以辭，辭曰：

五禮攸建，冠爲之先。備物祗事，無一或僞。筮期宿賓，列器布筵。弁閒皮爵，裳錯黃元。組纓屬缺，韎韜用延。尊罍有禁，栖禪斯甄。離肺充鼎，乾肺實籩。嘉爵旣祭，工祝乃傳。造字命辭，厥義則宣。維天有漢，灑氣成川。衝角奠軫，貫乎宿躔。夜翳旣斂，若練在縣。隨時運行，素色連娟。徵諸人心，同此儼鮮。森列萬象，徧爛八埏。出王游衍，與天周旋。有嫩鄭君，世胄蟬聯。十世同煬，義聞四傳。君實纘之，僉曰象賢。圖之回之，家政爾肩。泰之昭之，先緒愈綿。惟廉則礪，惟溫則瑄。處乎正中，有赫其平。漢名昭字，佩服允堅。一理是循，顧諟匪偏。相彼先民，日夕乾乾。一事或悖，六鑿相擬。君宜自勗，弗懈益虔。器服有銘，在古則然。敢補祝辭，以代韋弦。

黃瑄字辭

宣之爲文，上從一而下從二，從回乃取風回轉以宣通陰陽之義，尋復借爲布爲緩，爲明爲徧，不一而足。若加之以玉，則又爲瑄。蓋玉則象形，宜則諧聲也。爾雅云：璧八六寸謂之瑄。漢代郊祀則有司奉瑄玉，而瑄又通作宣。然則瑄玉者，亦玉中之最貴者歟。先師黃文獻公之嫡孫名瑄，濂因字之曰伯宣。且勗之曰：天地之間，貴者爲玉，賤者爲石。石譬則小人，玉譬則君子也。爾瑄出自瓊瑤之林，人固曰：此玉也，非石也。玉則玉矣，曷益之以礪琢之功乎。不然則玉徒玉爾，器云乎哉。雖然，器幸成矣，復局滯於一，而未能無施而不當也。瑄乎瑄乎，其用是而自勗乎。嗚呼！文獻公藏器於身，出而薦諸郊廟，非特器而已也。有如辟羨。

起度。凡諸玉之用。規矩皆自其中出。爾瑄慎勿愧之。瑄乎瑄乎。其用是而自勗乎。濂老門人也。故於瑄不敢褒而敢箴。系之以誦曰。

璧大爲瑄。孕諸石。孚尹夜氣吐秋魄。薦郊奠廟神鬼格。其儀食出犧與帛。媿義配名到幽蹟。爾性爾縉靡朝夕。予言服鷹宜無戮。

臧士幾字辭

臧君哲字曰文濬。密人也。以儀曹屬時詔爲司隸。然其爲人秀穎而嗜學。賢士大夫愛之。頗謂其名若字皆盛德事。殊非所以自稱。盍更之。君來請於予。予摘程子哲人知幾之義。字曰士幾。幾者善惡之發。榮辱之主也。可不慎歟。慎之如何。誠而已矣。作字辭。辭曰。

心神變化乘氣機。弩牙旣幹鈞石隨。或黑或白迺異歧。君子防之樹城障。嚴以金鼓列旌旗。百體從令志則熙。尙慎旃哉無殆而。

黃仁淵靜字辭

序有

建安才俊士曰黃生名汝仁。負超羣之資。朝出受易於部使者陳孟龍。至暮抵舍。復質所疑於仲父居德。亦奇男子。年十六時中私試高等。諸老生不中。譁於庭。居德因請面試。上官前。譁者執筆不能下。面頸發赤以出。以放生內外皆得師。學之日進。如水湧雲集。洪武辛亥秋。有司賢之。以生名上。福建行中書。試藝棘闈。八府之士充貢者二百。而司文衡者。又前進士林以順。吳尙志。郭麟。江惟志也。取舍甚嚴。或懼不獲。

在茲選及榜出。三十人中而生名居其四。遂爲易經諸義之冠。生之年始弱齡耳。明年會試南宮。銓曹急於用才。不俟再試。擢奉常贊禮郎。階入八品。有識之士。無不爲生榮。雖余亦愛生甚。時以問學。曷之。生因執經從余學。間拱手而言曰。仁初名文仁。有司援例以文犯周西伯之謚。加水於其左。及解名上。中書吏以白右丞相汪公。公曰。仁之義甚弘。無所不包。其可冠以汶字乎。宜去之。先達因取魯論仁者靜之言。字以淵靜。願先生詳發其義。嗚呼。考亭朱子釋此至矣。余何以言爲。雖然。不可無以答生之意。生之賦資固超羣。而求仁之方。不可不力也。爲序其事而申之以辭曰。

仁體凝重。屹弗遷。振古雄峙如山然。生意周流。踵至顛。一息有虧。用則愆。爾生心澄靜若淵。萬象森列。具不偏。返觀沖漠無後先。其機或動。矢發弦。雲行雨施。出自天。神功不宰。超虛玄。全體大用。昭以宣。上師周孔。下淵養。縱不及聖。肯下賢。流光不駐。若電燭。生其夙夜加勉旃。

張肯字辭

古者冠而字。敬其名也。三加之後。必爲字辭以祝之。或稽於經。或據於史。凡可以繕性。裨身者。無不可也。由此觀之。非惟敬其名。抑且以敬其身。能敬其身。則成人之道具矣。姑蘇張君芸己。敦實有學之士也。嘗名其子曰肯。又以繼孟字之。蓋取書大誥之義也。雖加冠於首。而未有爲之辭者。謂余補之。余雖弗獲從。大賓之後。與聞酌醴之事。然與芸己友也。輒陳所見而告之。其辭曰。

冠禮之重。爲敬其名。苟非其人。禮弗虛行。伊張氏子。世傳以經。名子曰肯。厥義則宏。吾爲爾陳。聳耳而聽。

有法於先。爾基爾楹。有蓄於前。爾播爾營。勿違厥時。必將必迎。勿闕其成。載厲載興。茲爲善繼。父事是繩。前者有作。後或匪承。此謂悖則。溺於淪冥。規既我蹈。矩復我程。此謂順德。令譽日增。二塗之間。美惡所形。擇善固執。弗撓而傾。況爾秀穎。如稼之青。翹然獨異。如木之榮。棟梁斯任。倉困載盈。上慎旃哉。學惟烝烝。余言止矣。爾其服膺。

王宗器字辭

王生璉。字宗器。其先太原人。今家濟南之長山。器局沈凝。而學問精密。洪武五年。以易經舉進士。山東名列第三。既上南宮。未試。皇上召見便殿。親命題賦詩。詩成稱旨。擢史館編修。賜以冠服。選入禁中文華堂肄業。詔翰林老臣爲師。同時而進者凡十又七人。車駕時臨策勵之。且取其文品評其優劣。日命光祿寺給膳羞酒漿。每當食。青宮暨親王迭爲之主。而璉等侍飯於左右。冬夏賜衣各一襲。復有白金弓矢鞍馬之頒。蓋不一而足。近又使璉攝御史。廉察河南。迨歸。奏對益稱旨。上悅。謂近臣曰。文華堂諸生如璉等者。皆朕異日將相材也。其期望之重如此。璉嘗從余學。故來以字辭爲請。予因序璉遭逢之盛於首。而著命名制字之義於辭。璉能聽之。必上不負於國恩。下不負於所學矣。辭曰。

宗廟之器。貴重實殊。夏有四璉。殷稱六瑚。周云八簋。異名同符。其貴斯何。珠玉爲飾。其重斯何。盛以黍稷。嚴奉明禋。神鬼是格。惟端木氏。才堪三卿。文章外見。以言語稱。汝器見許。載諸聖經。今生既長。局度純亮。發爲辭章。大河奔放。器字璉名。父師所望。出逢盛治。講學禁中。天日照臨。以煦以融。以達其衷。用廓其蒙。

學之茂矣。川之流矣。材之秀矣。木之修矣。蚤夜孜孜。唯道是求矣。豸冠巍峨。巡行洛河。貪夫夜逃。良士笑歌。君子之爲。君子之多。學無止功。勿畫斯善。辟彼行塗。足不留踐。百里至千。所見逾遠。志安於近。行局一偏。笙罔爲鏞。豆難充籩。規模卑狹。世則病旃。德藏於身。動無不被。厥用能周。由體斯具。生尙曷焉。庶幾不器。

王生致遠冠字祝辭

虎林王生。其幼也。父命之名曰驥。及年寢長。加元服於首。大賓字之曰致遠。蓋取梁徐勉所謂人中騏驥。必致千里之言也。按說文。驥。千里馬也。孫陽所相者。其字從馬。冀則諧聲。夫千里馬不常有。以謂世之奇才。亦未嘗數見也。以生名若字觀之。則父師所期望者。不亦深且長哉。予雖不及與聞。三加酌醴。敢抽蕪思。而弘敷其義。生宜聽之。毋忽其辭曰。

古者體物。取義孔殷。麟紀其瑞。鳳揚其文。表厥茂實。載敷清芬。其惟馬之族。本非一類。八尺爲龍。千里曰驥。因生有別。挺材見異。其伊驥斯何。墮地不毛。虎文彪炳。龍骨陂陀。天機趨騰。絕山飲河。其當其奮飛。神行電逝。若滅若沒。一日千里。晨燕晡越。視同游戲。其誰其似之。渥洼之姿。肉角飛黃。逸氣纖離。天閑翺翔。玉臺裴回。其奚官善馴。是澡是拂。秣以美薦。飫以香粒。筐惡屢漉。慮無弗及。其物尙有茲。人胡不如。天賦權奇。孰不自據。口噴紅光。長鳴九衢。其豈無王良。俾其振迅。未必鹽車。能厄神駿。三羸五駑。過者誰問。其生游藝府。逸思超羣。翦水爲神。製霞作文。亦既應書。名達帝宸。其九侍經藩。王出入禁籞。宮袍時頒。太官致

錄寵賚之隆。揆古無愧^其。以利天下。易經有辭。取譬奔蹏。漢詔以之。任重道遠。生寧勿思^其。一^其。曷以思之。朝夕兢惕。匪力足矜。所稱惟德。予言非誣。曷之無敷^其。二^其。

宋惟善字辭

宋氏自京兆遷汴。又自汴分遷吳興。虎林。虎林有名善字惟善者。實承其後。吳興則再遷金華。而予之遠裔也。予與惟善爲同宗。予侍講禁林日。惟善以學行貢諸朝。皇上親擢爲給事中。朝夕在帝左右。時被顧問。恩寵有加焉。已而兼靖江王府錄事。擢監察御史。改知濟寧府。未上。陞參山東承宣布政司政事。予與惟善爲同朝。瀕行。惟善來言曰。善以字辭爲請。已二年矣。叔父文墨之冗。日弗暇治。因未敢累執事。今將有遠行。叔父寧終靳一辭乎。予笑曰。惟善通書工辭章。經緯參伍。燦然成文。持節行州縣。彰善癉惡。又愜乎物情。是文學政事。嬰勝於人。縱予有言。將何有裨於惟善乎。惟善請之益力。予不能牢讓。因稽其命名制字之義。綴之以辭。辭曰。

陰陽迭運。道寓其中。繼之者善。性成乎躬。其善伊何。化育之妙。陽行陰具。萬理樞要。是曰天道。體用弗遺。式昭化源。用樹學基。有倬君子。夙著徽美。內功旣加。外聞益修。積久發弘。上簡帝衷。峻爵窮官。日致顯融。君恩如天。無不覆燾。昧昧思之。非忠莫報。往佐方嶽。審其政機。大見設施。春煦秋威。執滯盡疏。執蠹盡剪。孰才盍登。自邇及遠。此非外鑠。實善之推。成己成人。庶其在茲。我著我辭。徵厥名字。揭諸座隅。以示籤史。

補張馮加冠字辭序

瑞安張生馮。宋金部郎中聲道諸孫也。以文學薦於朝。擢奉常贊禮郎。奉常所典祀天神。饗人鬼。祭地祇之禮。其責任為甚重。馮能周旋佐助。而無越禮愆度。君子稱之。馮當冠時。大賓字之曰子翼。而未有造祝辭者。邇來監祀廣西。行中書省。參知政事黃君子邕。嘗為推說字義而序之。馮事予頗謹。閒復以祝辭為請。予按士冠禮。載其三加之辭。甚具。辭古也。而字說則今也。予雖不敏。弗能從。大賓與聞制字之義。馮之意難固拒也。遂勉以補其辭。辭曰。

冠而有字。為敬其名。曷為敬之。期學之凝。學將焉施。莫重夫祭。大嘏之受。因神所致。孰有賢行。慎擇為尸。豫撰厥几。庶堪馮依。豈惟佐食。宿有命戒。皇尸戾止。益虔弗懈。偏偏工祝。左承右趨。既贊道之。復扶助之。馮之謂何。如神斯據。翼之謂何。如鳥展翅。百靈繽紛。儼乎若臨。洞徹上下。精白一心。詩味卷阿。歸於孝德。放諸四海。準是為則。爾職贊禮。陟降廟郊。周折圓方。弗魯絲毛。非志之醇。疇能及此。宜勵其功。慎終如始。自此而推。泉達火然。孝親忠君。其道一原。內涵外充。壹循乎敬。大本既敦。末罔不正。爾有長才。發軔在茲。何遠弗屆。何福弗宜。探名索字。莘莘不已。賢亦何人。希之則是。

鄭氏三子加冠命字祝辭序有

浦陽孝義之門曰鄭氏。其十世之長仲德甫。筮得柔日。宿余為賓。將冠其從子木杲。果。余親與之周旋。降升。以成三加之禮。於是稽名定義。製字命之。夫平土有叢為林。因字木曰叔林。日在木上為杲。因字杲曰叔昇。丈夫致果為毅。因字果曰叔毅。命已。遂通祝之以辭。辭曰。

三加三醮。既備禮儀。昭告爾宇。各宜聽之。木從地生。含和茹滋。孤撐非貴。叢生乃奇。蔚若鄧林。陰陽蔽虧。欲構清廟。掄材實宜。毋學樗櫟。擁腫離疏。爲世鄙賤。工師莫覩。木其勗哉。夙夜克治。杲杲出日。新陽剛微。及昇扶桑。其光陸離。媿諸靈局。儼然弗緇。羣昏旣斂。洞察毫絲。毋若小夫。中宵而趨。隨埴索塗。陷於洿庫。杲尙勗哉。賢哲自期。人之立志。樹德爲基。唯果而毅。篤行不疑。譬之大將。建以鼓旗。奮矛爭先。矯亢欲飛。毋習異儒。如脂如韋。聞過罔悛。媿嬰委佗。果尙勗哉。振厲有爲。爾三子者。昧昧以思。彼蒼者天。體物無遺。或出或入。靡不爾隨。尙滌爾心。一髮不私。履善蹈道。君子之歸。苟務口耳。言從行違。奚翅積禽。安於鬚眉。世之恆流。父子異炊。脫有不善。衆方見嗤。況爾旌門。十葉聚居。名播寰宇。彤筆所書。尤當戰惕。若臨險巇。遵厥祖武。全其秉彝。羣翔於堂。東墳西篋。獨行於庭。左矩右規。庶幾無愧。七尺之軀。予年耄矣。百艱備罹。涉事旣廣。理能真知。諄諄爾誨。辭肯貢諛。請書座右。視如嚴師。

鄭柏加冠祝辭

浦陽江上有旌義之家曰鄭氏。其子姓多從余游。有名消者。執經爲最久。近又攜其子柏請曰。柏加巾時。賓字之曰叔端。而祝辭尙闕。願先生道補之。余聞記禮之家。以竹箭有筠。松柏有心。居天下之大端。故貫四時而不改柯易葉。蓋喻人之得禮則內諧而外無怨。旨哉言乎。今柏之門。內外莒稷。且十葉聚食矣。非禮有以管攝之。惡免無乖謫哉。夫端者本也。釋者謂四物最得氣之本。用此而不變傷。以端爲字。配名實宜。於是申之以辭。辭曰。

齊家之道。人情爲田。修禮以耕。耒耜用宜。薊其蕪穢。灌以淵泉。時功旣施。遲彼有年。逮其大備。食之肥鮮。稽顙取譬。柏號最堅。暨於松筠。同得氣原。青貫四時。柯蕊葉芊。外柔內澤。本固末綿。我挈其綱。物莫敢先。藉禮爲政。孰謂不然。民則底定。天和斯全。釋回增美。植正斥偏。情通上下。曾無閒言。揆諸稼事。理不少偏。爾生鄭柏。紳綏蟬聯。由禮達義。世已十傳。煦然春溫。嘉生繁駢。旌書焯煌。降自九天。爾生已冠。學維盡幾。朱唇漆鬢。玉潔珠圓。元賓加布。三祝於筵。取端配名。昂爾致虔。當爲嚮日。與鬱回旋。勿隨鮮葩。銜奇競妍。此謂敦本。確執弗遷。循名責實。夙夜乾乾。視辭止斯。爾其勉旃。

補臨川危安子定加冠祝辭有序

冠者責成人之道。其禮自天子至於諸侯卿大夫士。各有隆殺之節。儀文雖已失傳。唯士冠禮獨存。告廟筮期。宿賓命贊。弁有皮爵之等。裳有黃元之錯。器有尊甒。栖解之用。鼎有乾肺。離肺之實。三加而彌尊。制字以敬名。其爲禮甚嚴矣。夫何故事親從兄。忠君敬長之行。望其有所成也。古昔盛時。以冠爲諸禮之首者。其職此之由歟。自冠禮久廢。風頽俗靡。冥然夜行。如墮堙而索塗。君子未嘗不爲之永慨也。臨川危生安清敏好修。爲文辭亦整綴可觀。嘗從郡諸生肄業成均。學士大夫多延譽之。其師曾先生且初爲字曰子定。來謁禁林。求予爲之說。予謂字之有說。說文解字備述之矣。何假人言哉。然三加成禮之後。旣命之字。必造辭以祝之。是猶可爲也。於是歷序冠禮之嚴。定字代名者爲甚重。繼撥大學知止之義。而申之以辭。生慎聽之。其將躋君子之城矣乎。其辭曰。

人之初生。父命其名。弱齡攸屆。乃以字稱。此非彌文。實厚彝經。四行之責。用底於成。其爾生名安。以定爲字。稽諸聖經。敷列其義。必先知止。始奠厥志。射有正鵠。直趨而遂。其二方其未定。逐物而搖。紛紜舛戾。水湧風飄。及旣定只。類鑒孔昭。事至則應。順而不膠。其三曷爲致斯。因靜之故。靜爲動基。理罔弗具。辟地博厚。發育萬彙。區萌畢達。隨風而布。其四靜主乎內。靈扁廓然。靡隱靡顯。隨寓而安。天光昭煥。人滓將刊。漸獲所止。斯不爲難。其五惟古之學。明體適用。出輔邦家。瑞若麟鳳。逮及後世。葩藻是弄。誇多鬪靡。有如聚訟。其六昔我臨川學者所宗。仰視陸子。其猶神龍。駕風鞭霆。雨於太空。被其澤者。碩大而充。其七憫彼夸毗。以華喪質。直究本心。傲如出日。微言猶存。可以尋繹。生居其鄉。敢不自力。其八爾生長矣。燦如秀榮。濯濯而明。英英而貞。從師受經。啄其至精。亦旣有文。五色交綵。其九我後賓贊。不與酌醴。今補祝辭。庸申規厲。行固宜篤。知亦須至。安定其中。聖域可企。其十

東湖先生方君招魂辭

至正元年春。東湖先生年過九十。貌加癯而神益腴。一旦合賢士大夫於庭。先生被古冠衣。出肅賓升堂。已復揖賓咸東向坐。顧外孫楊恆執豆籩。乃從容舉觴而揚言曰。老夫耄矣。其去人閒世不遠矣。私自念陰陽之運。相摩相盪。而人實藉是以成形。有生者必有死。暫聚者必終散。嘗昧昧思之。上自頭顱齒髮。下自肩髀腰膂。不知何者爲可藉。何者爲可恆。乃欲長生坐閱世而不死乎。予每讀古書。見所謂豪傑之士。不可勝數。或提三尺之劍。擁百萬兵。喑鳴叱咤。而江水爲之湧起。或掉三寸舌。高軒結駟。游聘於諸侯之

閒亦足以攝強而下敵。若而人其材略雄矣。其精魄勁矣。吾將求而與之游。則已蕩爲飄氣。而無致詰矣。嗚呼。世之人。凡以有涯之身。與無涯敵者。皆可悲也。是以榮啓期。林顛之徒。有見乎此。或被索鼓琴。或行畦拾穗。雖至老死。不以戚戚少嬰其心。予竊慕之。嘗聞古有虞殯之章。蓋羣歌以挽。瀾於塗。與其施諸死後之鬼。孰若予親見之。賢士大夫。若不棄。宜賦詩以挽予。予當乘安車而出。使善言者道予而歌。予且擊輪爲節以應之。是未必遽減於秦淮海也。賢士大夫。若從予言。願舉此解爲賢士大夫壽。衆皆曰。然。先生旣行。解已。又舉解言曰。賢士大夫固挽我矣。予又聞古之人。有遭讒放逐者。或閔其魂魄離散。而不復還。作辭以招之。其人初未嘗死也。予雖無放逐之憂。而其精神皆已散竭。筋骨皆已罷憊。願未死耳。幸未死。有能辭以招我。庶幾翩然自適。與夫旣死而有靈。亦御雲龍。而一下聽之。又未必不輾然而笑也。此非屬吾景濂。而誰爲。願舉此解爲吾景濂壽。濂又曰。然。於是賢士大夫執解以酢先生。且各譔歌詩一章。以進。濂因製爲招魂辭云。先生名棗。字德載。姓方氏。越之暨陽人。其行大略見於延陵吳公所著碑銘。辭曰。魂兮旣來。毋遠征些。上下八極。皆曠冥些。華山如雲。倚空青些。下有芝房。炳明靈些。白閒綺疏。紫檀扇些。銅龍承樞。吐赤瑛些。繡帷高褰。耀輻輳些。綠地衛轂。若流星些。淳熬熊脯。盜鼎鏹些。狼腸凝膏。如玉晶些。九霞元冠。五綵旌些。麟衫麀裘。光熒熒些。玳瑁合節。鏘璫玲些。離灑巢和。一齊鳴些。折翮飄響。發繁聲些。趙舞激風。肖霓旂些。秦歌嫚迴。近懸瓔些。室中百具。無一不精些。中天化居。能及此清寧些。魂兮歸來。不越故庭些。

哀志士辭

奇俊之士。無世不生。特時人弗識之。或識之而弗能用。或用之而弗能盡其才。所以聲光不流於當時。事業不白於後世。予竊悲之。庚寅之夏。因覽元好問所錄入之諸儒。自辛愿而下凡五人。見其氣節剛方。言論磊落。實所謂奇俊之士者也。雖其行事或未能無過。終非齷齪陳腐。儼不振者所可冀其萬一。然恨其有志而不能遂也。因掇其大略。隸於各人之下。又從而哀之以辭。

辛愿。敬之。福昌人。年二十五。始知讀書。音義有不通者。搜訪百至。必通而後已。由是博極羣書。且善於文辭。尤以是非黑白自任。每讀人詩。必爲探源委。發凡例。解絡脉。審音節。辨清濁。權輕重。片善不掩。微類必指。如老吏斷獄。文峻網密。絲毛不相貸。雖貽人怒罵。不恤也。性疎宕。不修威儀。貴人延客。愿麻衣草屨。足脛赤露。坦然於其閒。劇談豪飲。旁若無人。家甚貧。衆雖嗷嗷。張口待哺。素負高氣。又不能從俗俯仰。其枯槁憔悴。流離頓踣。一假詩以鳴。雖百沮之餘。其耿耿自信者不少變。元光初。李獻能。元好問。在孟津。愿往見之。獻能爲設美饌。愿放筴嘆曰。平生飽食有數。每見吾二弟。必得嘉食。明日道路中。又當與老飢相抗去矣。會有一日。辛老子僵仆柳泉韓城之閒。以天地爲棺槨。日月爲含襚。狐狸亦可螻蟻亦可耳。聞者悲之。辭曰。天生爾才。胡不汝聘。麻衣如墨。下不掩脛。下不掩脛。不過寒我。我食無所。我生其可。水豈無藻。山豈無薇。苟非吾有。我敢采之。市魁屠伯。彼豈無食。我腹雖虛。我腰肯折。抱節而終。我則奚憾。烏鳶螻蟻。上下何辨。爾貧固甚。爾守則多。不義而富。其如爾何。

李汾字長源。平晉人。曠達不羈。好以奇節自許。避亂入關。關中無一人敢與相軒輊者。元光末。用薦書得從事史館。從事職名謂之書寫。特抄書小史耳。汾素高亢。不肯屈世。乃今以斗食故人。以府史畜之。殊不自聊。館中諸人又多新進小生。史家凡例。或未能盡知。就其所長。有不满汾一笑。故刊修之際。汾在傍。則蓄縮慘沮。握筆不能下。汾正襟危坐。誦左丘明。司馬遷文數百言。音吐甚洪暢。誦畢。顧四坐曰。看乘筆諸人。積不平。乃以嫚罵官長。訟於有司。證左相半。踰年不能決。右丞師中遣東曹掾置酒和解之。尋入關。驅馬來京師。日以馬價佐歡。道逢怨家。則畫地大數而去。會恆山公武仙在鄧。汾往說之。署行尙書省講議官。既而參知政事。思烈與仙相異同。懼汾言論。遂害之。汾孝友廉介。過人者甚多。寧寒餓而死。終不作寒乞聲向人。又善爲詩。清壯磊落。有幽并豪俠怏慨之氣。人以是稱焉。辭曰。奎星光光。今何其昏。大河東流。追恤無人。金匱石室。藏我冊書。豈伊羣兒。所堪穢之。我言弗信。弗信從汝。丘明雖鬼。其文不死。既不我嘉。覆謂我僭。我視我觚。有淚如霰。黃霧四塞。黑白誰分。彩鳳無華。山糲有文。悠悠蒼天。曷其有常。自右莫不然。爾又何傷。

劉昂霄字景玄。一字委房。陵川人。聰敏絕人。或戲取市家日歷。鱗雜米鹽者。令讀之。一過無脫遺者。故其學無所不窺。六經百氏外。世譜官制與兵家成敗爲最詳。爲人細瘦。似不能勝衣。好橫策兀坐。掉頭吟諷。幅巾奮袖。談辭如雲。四筵聳聽。噤不得語。遇其飲酒。眼花耳熱後。其鋒愈不可當。不知去古談士爲遠近。餘子不論也。嘗用門資。敍調慶陽軍器庫使。不就。諸公方薦試宏辭。未幾卒。辭曰。陋儒拘拘。以簡爲常。目

視環堵。不知有四方。狂瀾既倒。誰復迴之。氣蓋一世。獨爾能之。上自黃虞。下迨五季。一隙必燭。何有幽邃。或觸其機。談辭如雲。誰非男子。有舌無聲。我豈誇多。我豈鬪靡。一物不知。吾儒所恥。獨立千古。上遡寥絕。爾身雖窮。爾名豈滅。

雷淵字希顏。別字季默。渾源人。崇慶二年進士。授涇州錄事。不赴。改東平府錄事。以勞績遙領東阿縣令。東平。河朔重兵處也。驍將悍卒不可制。淵出入軍中。偃然不爲屈。不數月。家有淵畫像。雖大將亦不敢以書生遇之。調徐州觀察判官。召爲荊王府文學。兼記室參軍。轉應奉翰林文字。同知制誥。兼史院編修官。拜監察御史。巡行河南。榜掠賊吏。風采凜凜。蔡下一兵與權貴人有連。時以藥毒民家牛馬。以小直脅取之。淵捕得數以前後罪。杖殺之。老幼聚觀。交口稱快。然亦坐是失官。尋用宰相侯莘卿薦。除太學博士。再遷應奉。終於翰林修撰。累官大中大夫。先是正大閒。元兵突入。倒迴谷。勢甚張。平章芮公逆擊之。突騎退走。填壓谷溪中。不可勝筭。諸將議不定。釋之勿追。淵請急藏之。主兵者不能用。後聞北兵狼狽而西。馬多不暇入御。始悔不從淵言。淵學甚博。文甚奇。爲人軀幹雄偉。髯張口哆。顏渥丹。眼如望洋。遇不平。則疾惡之。氣見於顏閒。或嚼齒大罵不休。雖痛自摧折。卒亦不能變也。食兼三四人。飲至數斗不亂。生平慕孔融。田疇。陳元龍之爲人。雖其文章號一代不數人。在淵仍爲餘事耳。淵之友高廷玉。李純甫。亦以奇節自負。人號之爲三傑云。辭曰。爾心之勁。爾氣之剛。嫉惡如仇。不問暴強。將指出巡。面冷如鐵。霜簡所加。邪蒿卽折。才豈止斯。兵筭又長。眼見千里。孰曰不明。志不獲伸。多士短氣。其書徒存。九原能起。埃風四來。式脂式

韋有髻如戟。妾婦之爲我俗之昏。誰復繼君。茫茫九州。敢謂無人。

雷瑄字伯威。坊州人。志英邁。博學能文。以薦書從事史館。調入作司使。初并州李汾與瑄同在館中。以高蹇得罪。瑄往送之信陵。攜酒酌魏公子墳。握手痛飲。後去客陽夏。以鞭擊酒壺作楚聲歌。自言去國十年。甲兵滿天地。短衣疋馬。來自西北。將起楚漢間。奇才劍客與游。而不可得。當是時。金已遷汴。大河以東北。盡山東。西抵關輔。大軍長驅。徙少壯數萬人殺之。居庸關外。自黃河洛陽三門析津至丕之源。雀鎮凡二千餘里。潼關一帶。西南邊山。大小關隘。亦一千餘里。各分地界。統以總帥。夜則傳令坐守。冬則燃草敲冰。兼以關輔大飢。秦民死者相枕藉。瑄皆悲之。作商歌十章寫其情。曰。秦予父母國也。而一至此乎。竟淚下不能食。乃出奇策。白宰相。宰相不能聽。瑄去不知所之。辭曰。北風泱泱。海水爲竭。俯窺神京。不隔一髮。舉鞭擊壺。歌聲愈苦。來自西北。短衣疋馬。我淚旣盡。以血繼之。天門九重。曾莫聞知。孰秉國鈞。我將自薦。反謂我狂。斥去如箭。商顏有芝。曄曄蕤蕤。可以葆神。可以樂飢。長往不返。誰甘幽深。赤日在天。廉明我心。

葉深道哀辭

烏傷葉君深道。字逢原。沈確而有文。生與予友也。死則哀之以辭。

綱山孤張。華川瀦水。動溶漾。元精煦嫗。育裔蟬聯。爲里望。回鑿有疏。輓漕有猷。效忠亮。君出其後。丕續遺緒。宜炫燿。胡爲躓延。決瀉潰疹。闕難嚶。長始知學。優游厭飫。敢虛曠。朝蒐莫隨。會其肯綮。搃其肮。業成殘畜。如矢藏箠。弓入鞬。室廬枵然。有衣一襲。履一量。不隨游塵。上下鼓舞。相頡頏。嗟予蹇僿。感今思古。徒慨

仇辟諸豫章。絮之百圍。逢哲匠。愧彼紛紜。妄厠疊洗。忝盆抽關。啓鑰。浸漬薰蒸。予儻相。天胡難知。木邪制土。病腫脹。叫呶輾轉。晝夜變幻。熱以瘡。疾勢漸革。魂氣隨風。恣飛颺。楔齒綴足。髻笄緩中。禮是傍。善人宜壽。卒就黃墟。永淪喪。相此小夫。露牙揚齒。學豪放。手足胡越。豈知五倫爲世障。胡不顛蹶。反使亂真。日趨妄。嗚呼噫嘻。君今逝矣。予焉仗制。服總麻。存慕音容。哭相向。玄雲漫漫。涼風瀟瀟。吹總帳。我詞之哀。君知不知。倍悲愴。

蔣季高哀辭

至正丁酉秋七月壬午。濂畏暑。被髮行青松閒。忽有客自東陽來。曰。蔣季高氏歿矣。濂聞已。哭之哀。哭已。進客問狀。客曰。前月戊辰。季高以事如縣中。己巳。卽有滯下之疾。晝夜之行餘百。久之熱發。體中如火。其兄伯康懼。亟呼醫視之。醫至。脈已絕矣。自己巳至今月甲戌。僅六日。而遽至於亡。濂聞已。復哭之哀。乃尤天曰。嗚呼悲乎。不知何繇。而天吾季高乎。使季高其行負天地。愧神明。天之可也。季高恂恂儒者。非其道弗言也。非其道弗爲也。言其事親則孝。而恭處伯仲。則穆而和。交朋友則信而貞。遇族姻則惇而莊。接閭黨則惠而慈。求其致天之繇。無有也。今季高何爲。乃遽爾乎。豈高高在上。果不可必乎。抑其視夢夢。不能別善惡乎。所謂天道常與善人。其尙足徵乎。嗚呼悲乎。初濂年二十餘。頗嗜學。聞文懿許公弟子三衢方先生。以性理學講授東陽之南溪。徒步往從之游。先生所主。蓋蔣君子晦家。子晦。季高父也。濂因獲交季高父子閒。時季高尙未冠。卽能執經問難。進退雍容。肌肉若玉。雪可愛。歲幾何。旣哭其父。今又哭季高焉。

則夫人世如傳舍者。可不信乎。嗚呼悲乎。季高篤意於學。方先生既歿。復負笈師事。侍講黃公會濂。亦執酒掃之役於公門。與季高交益密。季高日出所爲文。皆雅馴。可傳誦。濂甚敬之。每一會。綉湖上。輒握手吐肺腑。閒酒酣。氣豪。競出慷慨背俗語。季高喜。益與濂親。季高善辨說。袞袞數千言不休。濂不能屈。每務力勝之。於是各大笑而止。且曰。良會不可數。一嘻笑。一怒罵。皆別後之相思。當時出此言。亦以爲常。豈知別後之相思者。乃爲死後之相哀乎。心雖如鐵石。其不爲季高一酸辛乎。嗚呼悲乎。去年之春。季高有書來曰。東西二峴山。無君足跡十年矣。縱不爲吾行。其可貽山靈之所笑乎。濂方閉戶著書。陸步弗妄出。不及如季高言。濂所居實浦。納青蘿山。出中林。樾蒼潤。孤猿野鶴。見人。了無驚猜意。而梅花泉。又極可飲。濂自念。雖不能爲季高往。季高清俊士。折簡招之。或可一來。當共飲水哦詩。或投壺白雲閒。亦一樂也。豈知季高遠棄濂而長逝乎。峴山之蒼翠。固在眼。寧不對之墮淚如襄陽乎。雖欲重登。願後瞻前。而季高不見。又寧不爲之感慨乎。嗚呼悲乎。季高之太夫人。年踰八十。母夫人髮亦種種。而三子方纍纍在疚。長者僅七齡。幼者尙居乳哺中。惓然可念。季高之死。兩目能遽瞑乎。嗚呼悲乎。季高已矣。濂將撫季高羣行。爲書以信後世。適有故未及爲。姑撰哀辭一通。焚之於墓。以寫中心之悲。季高其能有知乎。抑無知乎。岱嶽可移。瀛海可填。濂之哀吾季高者。尙何時而已乎。嗚呼悲乎。嗚呼悲乎。季高諱允叔。季高其字也。卒時年二十九云。辭曰。

有木蕤蕤兮。嗚呼。將鬯其施兮。嗚呼。霜雪何爲兮。嗚呼。竟從而折之兮。嗚呼。天者不可知兮。嗚呼。千載之

悲兮嗚呼。

郭淵哀辭

郭淵字濟川。六人。唐汾陽王子儀胤也。宋季羣盜起。淵聚族共保。若一障曰蔡堡。六人依焉。天下已定。民爲占籍。吏撓之。民見縣有爲丞相客者。無敢呵。相教爲丞相奴。淵謂民。民賤。王民也。奴重人奴也。使世世爲人奴。與王民孰愈。民愧而止。後樹吏。吏務休息。民而奴客困。皆來謝曰。微君幾不免。大德未。淮大饑。淵作饘粥食之。生者甚夥。是時人多鬻子自救。淵取困甚者。假子養之。十餘年。皆爲娶婦。居數歲。大穰。一朝縱之曰。若事吾良苦。及時歸。毋久留爲也。皆涕泣曰。公生我。今驅我安之。願留終公身。淵曰。毋悲。後吾子孫不省。將以汝爲奴。卒縱之。人有貰酒飲西家者。已醉而出。遺所贖銀於門。淵適見。藏弄俟之。明日遺金人。從西家求金。西家誠不知。怒以爲欺。求之急。西家怒。益閉其人。因欲自剄。方爭。淵聞之。遽出呼其人。與之所遺金。人皆驚。始保蔡堡。羣少年共劫一人。將殺之。淵呵曰。此何罪。至殺。羣少年曰。此疑狙伺爲讎。而將襲我。故殺之耳。曰。吾所爲相保以生。誠惡死也。今疑而殺人。禍將及。羣少年怒。淵私計奪之力。且追殺之。乃曰。吾代之贖。何如。羣少年喜。遂免之。後至昇。昇市中有戴拒妝盤鬻於市者。遇淵。置戴盤叩頭泣曰。今日遇公。天也。幸臨過我。我有母。皆願見公。謝淵固辭。假以爲誤。去之。市上老人歎曰。世稱長者。此真是耶。初六界北邊。民習兵少文。淵與父訟。以詩書俎豆爲業。人慕之。多化者。至今六多儒。淵旣卒。其孫言抱李孝光所造墓文。請濂哀以辭。濂未及爲言。客死豫章。可悲也。始言與濂游。語及當世。輒瞑目嚼齒。語

皆驚人。聽者掩耳避去。及操筆綴辭。則海蜃吐樓。而芝罘翠輦。隱見空濛閒。可怖愕。言誠奇男子。濂故刪孝光文爲辭。哀淵且附見言事。以見可哀不特淵也。辭曰。有開其先。熙以申。有紹其後。文以彬。何過其施。祿以屯。

王季楚哀辭

王仲淮季楚。越人也。其父良。嘗檢校江浙行中書。政成。謁選京師。時季楚年方二十餘。請從行。既至。有多季楚才者。薦其名。遼陽行中書。授季楚大寧路儒學正。未幾。以病卒。檢校君哭之甚哀。既請國子監丞陳公旅撰銘。揭墓上。復謂其甥方泗曰。予深哀仲淮。旣不能壽。而又客死。其二子。基始八歲。塾始一歲。儻然也。仲淮有知其能。瞑目乎。聞汝交友多能文。盍求辭以哀仲淮。且慰我。泗來爲濂言。濂竊悲之。初濂見季楚於泗家。眉目秀整。每言輒牽引史傳。幾若貫通者。濂方意其必進用於時。今若是。世之人欲以智力相雄長而不知止者。果何如耶。辭曰。

冥冥玄化。孰尸其權。胡予其才。而不予其年。嗚呼。

陳子章哀辭

嗚呼。吾子章竟止於斯邪。始予游學諸暨之白湖。而子章實來。予因獲與子章交。當是時。四方來者類多。純綺之子。喜眩文綉。以自媚。人爭悅趨之。獨予之貧。短衣纔能至。軒冷處前簾下。四壁蕭然。誰復見顧者。惟子章與予。燈影相望。而讀書之聲相接也。予時學未聞道。心願不能平。子章嘗慷慨厲予曰。子量隘矣。

是焉足以汙子哉。子章好使氣。人稍加昵。白眼視之。至其去乃已。予因用子章厲予者厲之。子章矍然謝曰。是善教我。子章自是與予居。至驩也。予既還金華。子章亦去。越三年。予再見子章於烏傷。更相勞苦。子章握手顧予曰。子之貧尙爾邪。子但力學。天殆不能貧子也。予觀子章貌加壯。其厲予一如諸暨時。未幾。予復西還金華。又二年。予束書寓浦陽。子章聞之喜。以書來曰。予昔在諸暨與子居。僅四月而別。在烏傷未十日而別。今子來浦陽。浦陽子父母邦也。予家距子之所寓不百里。庶幾與子少相羊乎。予亦喜當與子章時相見也。又三年。子章未嘗一來。予竊怪之。因詢子章所嘗往來者。具道子章病咯血。氣厭厭不振。予謂是疾勢雖迫。人得良醫可已。未始爲吾子章憂。又四年。子章竟死。嗚呼。吾子章竟止於斯邪。予之交友固多矣。如子章者。寧幾人哉。積二十年之久。僅能再見之。蓋以子章春秋始壯。予雖少長。亦不過二三年。其與子章游。未晚也。豈知子章遽先予而棄去乎。予蚤知子章若是。又敢憂百里之遠。不與子章周旋乎。子章已矣。孰能相予之善。孰能指予之疵哉。予雖欲不衰子章。不可得已。因從而著其辭。子章諱璋。姓陳氏。子章字也。浦陽人。辭曰。

已乎子章。天賦爾材。而鍾爾精。宜乎輝赫其聲光。振拔其華英。不秩登於百石。亦名薦於九卿。奈之何單襦短褐。不知珪組之貴。藜羹糗飯。莫沾鼎餼之榮。雖足勤乎敝屣。神憊乎篝燈。竟不少用。而遂潛輝韜迹於泉扃。則吾子章何如勿生。已乎子章。白楊萋萋。宿草莽莽。悲泉咽而不流。寒雲鬱而欲聚。以吾子章之才之淑。而遽下制於一坏之土。寧不使予撫遺文而增慨。想音容而惻楚也耶。嗚呼唏矣。

哭張教授父子辭

濂同縣張公繼祖。力學而尚志操。少讀魯仲連傳。見其排難解紛。歎曰。士當如是而已。大德中。縣有桀黠吏。挾重辟害民。民恒怯。莫敢觸其鋒。公直之部使者。時吏方抱案在庭。公面疏其奸。卒置於法。延祐閒。郡上公才行。署雙溪書院山長。考第成。遂調瀏陽州學教授。公爲復侵疆。稽其步畝。刻石學宮。會守貳闕。太府檄公攝州事。時歲薦禱。道殣相枕藉。方下令勸分。公爲設方略。使持券者左入。受粟者右出。竟事帖帖無譁。居二年。以大父喪。棄官歸卒。其子道生。力學如其父。屢應進士舉不利。困頓殊甚。適余觀以監察御史行部浙東。覲同舍生也。召見相勞苦。薦爲武夷書院山長。未幾亦卒。初濂年幼時見公。公卽相器重。與爲賓主禮。俾同道生師事城南聞人先生。逮今粗知學而不陷於小人之域者。皆公賜也。濂旣往哭公。會未幾何。又哭道生焉。雖石人猶當墮淚。近抱疚在席閒。中夜尤念公父子不能置。起篝火濡毫。申之以辭。辭曰。

番番良士。僅以教施。才不盡展。人期有兒。兒今死矣。吁其悲。

哭王架閣辭序

王君棧。字德潤。濟寧金鄉人。祖仁。義烏丞。父端。溧水州稅務大使。母劉氏。君少警敏。人物又魁傑。嘗掀髯自咤曰。王棧不尋功名。功名當自來。逼王棧爾。豈有錐在布囊而末不見者耶。遂學治經。試進士不中。卽棄去。攻法家書。爲衢處二府吏。尋補書吏。浙東廉訪使者府。遷浙西。名上江南行御史臺。辟察院書吏。已

而貢入中臺察院。出調浙西道肅政廉訪司照磨。兼承發架閣。裨贊憲政。人器其材。因會酒言忤御史銜之。以事中君下符遠就吏。君坐樓上歎曰。男子頭可斫。膝不可屈。死則死。肯與獄吏對乎。遂拔刃自剄。左右急救。君已仆地。血滂然流。君妻劉及子僧僧。忍泣具棺斂。載入金華。卽城北五里藏焉。蓋君自幼寓金華。又以女妻縣人江演。兵起山東。道絕不能歸。故君喪來葬。而妻子皆來依江。初。余入郡。從聞人先生學。君同日至。與之語。又知同庚。戊生。人相驩也。晝摩切經藝。晚則捉手同游衍。或縱談大噓。憤墮地弗顧。或聯詩纔脫口。卽促繼之。遲則罰。昏鼓動。琴瑟始歸。日以爲常。一旦去爲吏。余遂不以書記通。有自浙水西至者。出君手書相勞苦。且曰。吾薦子於方嶽大臣。行授子校官矣。子能爲我一出乎。余以書謝。復固辭。居亡何。聞君死矣。余之辭君者。非託此以爲名高。竊自念貧賤士。何往不自得。君固不忘故人。余足一動人。必病余以爲挾且私。是以弗能往視君。俟君他日歸休。御款段馬。候君青霞白水閒。未晚也。嗚呼。孰知君之遽去。余而死矣乎。使知君之遽死也。縱百千其人。以爲私。以爲挾。朝夕迭提余耳。而噪之。余尙何恤。必能謁君虎林之上矣。今復何言哉。今復何言哉。君旣不可見。乃絮酒裹鷄。走哭君之墓。僧僧知余至。哭迎于途。儼然也。余心益百折不自勝。造爲哀辭一通。以洩余情。雖然。余情其得而盡洩乎。君卒時年四十七。至正甲申九月十二日云。辭曰。

職尊青黃。嘉木之灾。樗大蔽牛。不以爲材。使君非材。行己昧昧。過者弗睨。孰得而害君。旣材矣。人誰舍旃。高位疾顛。理之必然。氓之蚩蚩。匪材曷治。君仕則當。不仕無義。孰不顧融。君闕而凶。豈仕之尤。祗繫其逢。

所逢者時。固有通塞。亦命使之。君復何惑。物忌大剛。不缺則刃。自君取之。命復何云。君若居柔。觸物惟忍。非惟保名。身何能殞。從古有言。柔則詭隨。縱生千齡。非君所宜。君死雖亟。君膝不屈。君氣凜然。千古莫奪。人孰不死。君死則寧。尚可謂君。鴻毛之輕。君何用哀。我哀有以。天方壽君。君則自死。我苟無罪。誰敢死余。一朝之忍。惜不爾思。妻子笑笑。東西顛沛。君在九泉。亦將自悔。我則深悲。豈直悲君。悲法之墜。法既墜矣。君宜長逝。彼豸斯冠。天亦不畏。

悲海東辭

玉山鄭先生原善。字復初。延祐名進士。起家德興丞。轉處州錄事。有異政。爲衆所忌。遭誣搆去官。尋以疾卒。臨川危君太樸。病執法者不得其平。爲著悲海東辭。濂亦繼作。時元統癸酉冬十月丁亥也。

我悲海東。我涕拭矣。善人云瘁。邦其棘矣。倬彼昊天。冒此下民。彰善殫惡。胡莫之懲。冥冥其晝。不見出日。飄飄雨風。墮我家室。家室墮止。邦國危止。豈遽危之。遠將自邇。大君維河。冢宰維舟。卿士維楫。烝庶維徒。上下相力。厥載孔速。苟不是念。不膠則覆。維彼哲人。化爲螟螣。維彼愚人。猶如鬼蜮。鬼蜮戢戢。巧爲我賊。螟螣僥倖。蝕我黍苗。我民我牧。唯恐傷只。彼豺伊兕。敢爲民瘠。旣啜其旨。復監其髓。我真我法。孰云能已。淑爾君子。綉衣孔揚。有瑯葱珩。有節斯煌。不我能勗。覆謂我爽。冒我絜我。絕不畏明。譬彼鸞鳳。見藻是食。有振者麟。邪蒿爲室。式紛式錯。動罔不忒。嗚呼昊天。曷其有極。姓姓其鹿。乃索之江。中林喬喬。乃求其魴。顛倒眩瞽。以逞無良。嗚呼昊天。曷其有常。無然悞亂。無然悞淫。無然回遙。以虹我心。爾之悖矣。民胥害矣。

爾之迪矣。民相憐矣。勿曰丘陵。崇不可夷。勿曰淵冰。堅不可摧。忽爲平陸。忽若流澌。誰與爾謀。曾不爾思。謂爾醉止。黜然無知。爾不用酒。何德之遠。謂爾蠱止。上下卒迷。日用飲食。不愆厥初。其止遽遽。其行踣踣。其慘喙喙。其威虺虺。我淚旣竭。繼之以血。百海其深。莫喻我心。我生不辰。伊誰之云。無越我牆。我垣我藩。無萊我田。我田我廩。天命有定。我將我怨。爾無人怨。我爾用歆。乃塤乃篪。乃瑟乃琴。乃磬乃笙。以樂其音。以樂其音。實獲我心。峩峩墮山。山則有樗。彼淮者淵。淵則有魚。匪今獨然。振古如茲。我苟不樂。不樂奚爲。

廣漢難辭

難、古禮也。周人三時皆行之。春冬之季難。難陰氣也。仲秋之月難。難陽氣也。蓋二氣或佚。厲將乘之爲災。故難以止焉。其制命方相氏帥百隸索室區疫以逐之。又磔牲以禳四方之神。漢襲周制。而其儀加詳。選中黃門子弟百二十人爲侏子。赤幘皂制。執鼗。方相黃金四目。蒙熊皮。玄衣朱裳。執戈揚盾。十二獸有衣毛角。中黃門行之。冗從僕射將之。以逐惡鬼於禁中。夜漏上水。朝臣會侍中尙書御史謁者虎賁羽林郎將執事。皆赤幘陞衛。乘輿御前殿。黃門令奏曰。侏子備。請逐疫。於是中黃門倡。侏子和。其辭凡八十言。繼作方相與十二獸。儼謹呼徧前後省者三。持炬火送疫出端門。門外騎士以次傳火。棄雒水中。自漢至今。朝廷之難雖廢。而民間猶有存者。先臘一日。巷氓社隸飾鬼神貌。御五色龍虎文衣。巡門擊鼓而難之。予惡其言鄙褻。因疏古者用難之意。復廣漢辭使習焉。其辭曰。

陽陰乘化。左右而行。日歷昴畢。得積屍大陵。其氣勃芒。更涉虛危。墳墓西司。鬼官攸房。厲附強陰。而降於

覺殃。咨爾十二神。宣其威良。焱突。飗兀。臍胃。食虎。甲作。食殍。雄伯。食彪。騰簡。食不祥。攬諸。食咎。伯奇。食夢。祖明。強梁。共食。磔死。寄生。委隨。食觀。錯斷。食巨。剝其。腎腸。窮奇。騰根。同享。於盡。毋使。害傷。咨爾十二神。鍛爾。戎兵。出輟。四方。吮厲。之血。以代。酒漿。解厲。之肌。以充。糗糧。絲厲。之臆。織以。爲衣裳。斥除。隱陰。暢回。明陽。乾坤。載清。物楸。民印。惟爾。神之。功。神或不。獲。上帝。是明。急急。如律。令。

補雩壇祝舞歌辭

周官有司巫。掌羣巫之政令。若國大旱。則帥巫而舞雩。漢法夏不雨。祀竈。毋舉土功。更火浚井。暴金於壇。杵曰於術。爲四通之壇。於邑南門外。方七尺。植赤繒七。其神蚩尤。祭之。赤雄雞七。玄酒具。清酒搏脯。祝齊。三日。服赤衣。拜跪陳祝辭。以丙丁日。爲赤火龍。一長七丈。又爲小龍六。長三丈。於南方。皆南向。壯者七人。皆齊。三日。服赤衣而舞之。司空嗇夫。亦齊三日。服赤衣而立之。鑿社而通之。閭外之溝。取五蝦蟆。錯置社之中。池方七尺。深一尺。酒脯祭齋。衣赤陳。祝如初。取二歲雄雞。豕。燔之。四通神字。令民閭里南門。開里北門。幸得雨。報以豚一。酒鹽黍財足。以茅爲席。然周制久廢。典午以降。漢法亦不行。而祝辭尤闕。歲丙申。夏旱。羣巫雩於山川之神。予既書其事。於泰鴻。冒下民。動以化。時屈伸。爆朱鳥。萬物甄。亢則害。陽畢屯。土膏耗。蕪欲濟。田峻奔。勢維殲。壇四通。優明神。神中臨。勃如烟。鬯嘉錫。燦若羅。繭握薦。豕炳管。蕭灌鬱金。菊芳赫。氣上延。合溟溲。洞五精。貫八幘。茫無外。莽脩脩。門沆碣。駕以焱。俯下土。無不釗。

鬱行風羽輪翔。元黃變。慘復爽。衆媼集。亢景章。蕤然存。索之亡。爍陰明。迴叢陽。符翹襟。逝弗忘。崇明禋。成稽功。憑紺筵。嚴以叩。應上公。與天通。植赤繒。驂紅龍。左列缺。右豐隆。流火降。鉅若鴻。鬼婦劉。散爲風。灑靈注。徧四封。函斯活。穎茸茸。衆維魚。兆已從。融社暉。毓宵氓。甫田阜。物豫成。風平平。綽以行人。寒與鬼。盼靈耿。躍振霈。充盈。神心暢。樂茫良。四寓綏。萬國洋。洽大康。慶昭膺。

楊刺史廟迎享送神歌辭

浦陽鷄冠山上有古神祠。相傳祠漢交州刺史楊侯。侯。縣人也。名扶。字聖儀。累官皆有惠政。侯歿已千載。民以雨暘禱輒應。是侯之神在天。猶不棄於吾民也。吾民其可忘於侯乎。濂雖不敏。爲撰迎享送神之辭。俾邦人歲時歌以祀侯。其辭曰。

紛溶溶。眺天門。白蜺出。雜雲敦。翩我靈。整修駕。車登登。般裔裔。翩我靈。降潛場。回旒與。與之翔。翩我靈。變陽陰。奔以放。光淫淫。翩我靈。續如膺。神鬼衛。鳥翼張。

紛溶溶一

神筵啓。混朱黃。愉以康。悅芒芒。奄靈車。奠芳酌。爵行千。流若雨。奄靈車。蕙爲肴。饗且飫。以舞歌。奄靈車。靈已醉。廣宣延。無不備。奄靈車。樂無極。神山高。高可測。

神筵啓二

氛翼翼。欲上升。指青元。化爲文。靈之旋。疾如風。從西虎。導東龍。神之旋。髻長逝。凌紫青。瑤光下。靈之旋。兆

逢傷景已滅。猶放悲靈之旋。錫我祐。沛若雲。雨下土。

氛翼翼三

題辭

菊坡新卷題辭

當塗陶君用高。蓋出於晉徵士元亮之裔。凡宦轍所臨。必效前人種菊花滿坡。當萬木搖落時。花始秀拔。低昂枝上。若赤金所鑄錢。頗可玩。用高公退之餘。酌酒與花對。恍然如在柴桑籬落閒。殆忘其章綬之榮。築牘之煩也。或者疑之曰。仕者樂乎朝市。故馳而弗息。隱者慕於山林。故往而不返。有若水之與火。未易合也。昔者元亮遭時孔艱。不能爲五斗米折腰向鄉里小兒。因有託於菊而逃焉耳。今用高則不然。生逢有道之朝。亦旣由憲史檢校中書。而主畫於秋官矣。衆咸以致君澤民期之。用高則留情於菊。若將與世相違者。無乃不可乎。嗚呼。是何言歟。是何言歟。觀人之道。不於其迹。而於其心。迹固朝市也。而心則不忘乎山林。謂之吏而隱可也。迹或滯乎山林之中。而其心則豔華趨榮。無一息之不思市朝。苟謂之爲隱。孰能信之。況君子之出處。可仕則仕。可隱則隱。初何容智力於其閒哉。設使元亮當今之時。將不能不仕。而用高生於元亮之世。似亦不得不隱也。世之人學元亮者多矣。皆在乎去位之後。用高則見於在官之時。此蓋魯男子之善學柳下惠者也。用高誠賢乎哉。予固不敢以用高方之元亮也。以其志之或同。而他人未必能知也。聊相與一言之。并作采菊之辭。以遺用高曰。我采我菊。露其和矣。今我不樂。鬢其皤矣。鬢其

幡矣。吾行歌矣。我菊我采。露其晞止。今我不樂。白日馳止。白日馳止。吾顏衰止。歌罷。用高攬衣而起。曰。贈予言者盈三帙矣。子頗能知予之志。曷爲書於新卷之端。俾詩家者流繼之。他日約子於三徑閒。俯仰西風。歌此辭而餐落英。顧不美歟。予不敢固辭。用高通儒術。爲人仁厚。士林中多稱之云。

羅鄂州小集題辭

有倬羅公。家於歙邦。幼名曰愿。冠字爲端良。其父吏部。內外踐敷。春秋之學。與胡氏抗衡。生子凡六。皆能辭章。公居其五。尤赫赫有芒。旣收世科。歷仕縣州。出刺武昌。阜蓋朱旛。績用翁以張。夫自五季以來。文氣日異。宋室龍興。篤生哲師。汝陽浚其源。二尹導之。元城倡於前。范張和之。逮於廬陵。日粹以夷。臨川南豐。眉山父子。同餞而聯輝。清寧協順。功用發揮。精氣充斥。暢達蕤綏。變化合神。而光景弗虧。奈何王轍旣南。涉於偏頗。衰俗羣趨。以事決科。浮聲切響。駢言儷辭。襲謬而踵訛。公挺其閒。弗徇弗阿。濯其孽疴。障其頽波。謂六經之作。如日行天。不可以軋摩。唯秦暨漢。是則是效。接其遐軌。而視法在軻。然而畜之不弘。則動之弗振。涵志今古。潛神典墳。玩陰陽之交。察海嶽之文。暨治亂之變。通典禮之津。以至稗官。虞初。旁行敷落。鳥獸蟲魚之倫。凡可以資博識者。咸區別而彙分。力思精索。從莫達晨。玄功以凝。將通乎鬼神。故其形諸篇翰。鑰啓繭抽。高雅精鍊。莫之與逮。喬嶽嶢然。上凌太清。而陋夫土丘。戴冕執圭。屹若山立。而異於卉。裘棠溪之金。美則爲鏐。千將之鐵。百鍛始逾。視彼蝕鑰腐鉛。復乎不倖。考亭朱子。取法魯騶。發人瑕類。一髮必讐。獨推公文。而弗舍者。以協理之微幽。嗚呼。公旣逝矣。遺文四行。唯於東南。粲如列星。遭時不平。遂

壞於兵。其諸孫宣明。賢而有徵。懼懸黎之鏿彩。結綠之沈英。復鏤於梓。以震其聲。以開其冥。以鑰於衆聽。濂也不敏。幼誦公文。蒼白無成。搏朽壤以代礪。不歷亦傾。採敗屨以爲弧。莫使之綳。其瞻公之製作。猶應龍之降升。區區贊述。何繫重輕。姑序其作者之意於首簡。使後生小子。知豪傑之士。不爲衰俗所囿。而雄渾之作。或當與秦漢并。

宋學士全集卷之二十

贊

文右相像贊

才優德純。山峙玉溫。重厚可以鎮俗。仁恕足以澤民。或陳經術而侍青坊。或秉霜簡而立紫宸。終受知於聖主。宅右揆而相秦。深沈有謀。真潞國之裔。剛毅忠信。誠絳侯之倫。觀其屹立不動。正笏垂紳。猶可作儒夫之氣。而褫邪佞之魂。嗚呼。此所謂邦家之重寶。廊廟之大臣也歟。

婁貞公贊

原武婁宗仁。當天后政嚴之時。獨以寬厚聞。其弟守代州。宗仁教以唾面自乾。至今爲善者師焉。因贊之以自勗。贊曰。

我言之忭。斯辱之招。我行弗足。或貽其辱。二者無失。其至由外。內省不疚。我則何罪。我面彼唾。乃彼之愆。我何潔之。正使自乾。孰忿自乘。攘袂而閔。孰量之弘。受詬如頌。是非苟繆。不亦殆而微公之師。吾誰與歸。

陸秀夫像贊

身抱龍髯兮。眼不見水。鳳闕雖遐兮。龍堂則邇。玉雪儼如兮。肯污泥滓。赤日出海兮。爾心不死。

滕奉使贊

齊人王燭有言曰。忠臣不事二君。烈女不更二夫。女之從人。一與之醮。當終身不改。譬之白璧。小有玷辱。人將斥去而不之顧。臣之事君也。其理亦同。故燭特並言之。事兩夫者。雖辨如虞姬。智如鄧曼。吾知其決非良婦。事二君者。雖功如汾陽。才如西平。吾知其決非良臣。嗚呼。使此義昭如白日。人臣安肯懷二心。而國安有喪亡之禍哉。東陽滕茂實。當宋靖康初。以太學正與僉書路允迪奉使於金。議割三鎮太原。尋奉密詔。據城不下。金人怒。囚之雲中。欽宗北遷。茂實謁見。涕泣請從行。主者不之許。其後允迪南歸。茂實獨留雁門。終身不再仕。臨沒。令以黃幡裹屍而葬。仍刻石識云。宋使者東陽滕茂實墓。此殆不事二君者歟。當是時。有宇文虛中者。亦以黃門侍郎使金。見留。遂改節易行。反面事狄。其後雖欲奪兵仗南奔。而自贖。卒亦不逃。君子之譏。其視吾茂實。果何如也。茂實已矣。人至今想其遺節。如神龍不可得見。至視虛中輩。不啻若鬼蜮犬豕。有識妾婦亦羞聞之。此無他。人心天理。終不可誣也。乃作滕奉使贊。用規事君而有二心者。贊曰。

漢有蘇武。奉使不屈。滕公配之。有聲烈烈。黃幡裹屍。以全臣節。如璧之白。弗緇弗缺。其人雖亡。精神不滅。上遊帝所。凌厲日月。降臣見之。肝碎膽裂。敢述贊辭。勒在貞碣。

東陽十孝子贊

十孝子者。皆東陽人。其事載於郡乘。爲詳。予讀書之暇。因探其昊天罔極之思。而爲是贊。以風世之爲人子者。

秦顏烏鳥傷人

古有醇孝厥姓惟顏。父喪未葬。行泣道閒。我奮我錡。是藿是瘞。彼羣烏何知。銜土予助。我家既封。烏吻血流。感爾異類。愧我同儕。秦風日漓。借縷鉏而德色。誰意露雲之四蒙。見此皦日。千載之下。禮憲淪胥。豈獨愧君烏亦不如。有廟嚴嚴。春秋是祀。用與薄夫作孝子。

吳斯敦東陽人

有孝者斯。峴山之阿。父罪當誅。兒心奈何。自非吾親。盍從生我。我寧隕身。父死其可。九關義義。虎豹斷斷。泣血上書。願易以身。王用爾恤。卒全父命。更旌爾門。風彼不令。池波翁淪。辛木扶疎。清風肅然。過者下車。

晉許孜東陽人

嗟嗟許生。實孝於親。胡風木不停。遭此難屯。輜車既載。負土築墳。我親我崩。敢曰勤彼鄉民。手胼足胝。我不爲辛。巾笥猶存。几筵不改。惕然念之。吾親何在。秋霜凝凝。春雨灑灑。父兮母兮。得無苦寒與饑。兒旣不見。寧不念茲。天高可極。此情罔極。鹿獨不閱我。觸我松柏。嗟嗟許生。厲志不移。終身之慕。於子見之。

唐馮子華東陽人

緬彼孝馮。棺廬墓傍。思親不見。欲與俱亡。白月寥寥。悲風四起。蒲伏號呼。哀徹心髓。天錫嘉瑞。慰我孝思。有皦斯兔。有煥斯芝。孝馮曰噫。吾焉用汝。九京莫與。百瑞奚補。唯爾孝子。樹我世防。雖歷萬祀。厥德彌章。自公之亡。肖公者幾。茫茫堪輿。孰非人子。

唐應先東陽人

卓哉至行。衆人所難。眷我應君。投涕洟瀾。親之云亡。中心咽塞。雖草生髮閒。何暇束櫛。昔處膝下。其樂決決。今我來思。舉目但見白楊。彼蒼者天。曷不我憫。苟可從之。我生奚恤。爾心之苦。爾行之優。雙闕峨峨。卒承天休。

唐唐君佑東陽人

唐氏之子。以孝行聞。死生一節。弗歧弗分。唯思親不置。鞠明究曠。誰無父母。以樂以愉。今我何罪。獨行次且。我罪之深。我宜隕墜。胡獨使我親。先彼朝露。昊天不弔。直至於斯。渺渺音容。如何弗思。官用褒旌。封報在舍。匪私爾一人。式勸來者。

陳太竭浦江人

浦泖之閒。有氏曰陳。親沒居廬。衰麻終身。心勦形瘵。杖而後起。一氣如絲。去死無幾。朝哭如吞。莫哭尤不忍。聞松風。倚倚林鳥。嚶嚶來助。予之悲號。遐思弗寧。起奠我爵。果肴在前。烏烏爲之不啄。世瀨失防。頽彼滉漾。我思古人。古人焉往。

宋董少舒蘭溪人

有倬董君。父以令終。躬負厥土。馬鬣其封。四郊無人。夜寒如水。黑黳潛興。如臨神鬼。董君出廬。擁墳撫膺。念父寥寂。長哀無聲。日兮月兮。能照下土。寧不閱我最苦。願亟入九泉。奉我父母。靈芝煌煌。駿發爾祥。蓋

紫翰黃於燦其光。有焯董君。德聲斯不亡。

宋金景文蘭溪人

澗水之州。三山之坡。下有孝子。孝如之何。父疾在首。顧天請代。願孝予身。我親罔害。母棺未窆。執纊以前。天光下燭。五色粲然。五色粲然。未足爲偉。怪電殫風。勿犯其里。苟匪中忱。曷以臻此。縣代是師。於戲孝子。

宋賈南金金華人

孝道之弘。百行所生。誰與賈氏。實敦古風。生弗離親。沒安可棄。忍令親之玉體。爲泉扃所閱。晝雖不可見。接以夢寐。夢中相見。宛其未死。覺後求之。寒燈在几。得不慨茲。濟濟墮淚。嗟爾孝德。閱我章逢。栴蠟其貌。黼黻其躬。父子相軌。或不相容。我述贊辭。用發民衷。

許魯齋先生贊

濂洛之學。傳自武夷。重徹疊照。日星昭垂。逮我許公。尊聞行知。若親摳衣。寒泉之糜。張皇幽眇。釐析毫釐。如皋陶淑問。畢其情辭。如后羿注矢。不失其馳。旣入闔域。遂升堂基。橫經宵監。衿佩鏘如。祛其人私。牖世天彝。釋其偏歧。挽其九衢。德成財達。昭用如時。黼黻帝治。甄陶素熙。明體適用。公實庶幾。無德弗報。四海祝尸。嗚呼許公。百世之師。

劉靜修先生贊

先生之心。嶽鎮川澄。先生之操。玉溫石貞。先生之學。寤寐六經。岐陽之鳳。魯郊之麟。和氣襲人。盎然陽春。

發周孔性情。悒其深醇。或出或潛。與道周旋。九原可作。吾爲執鞭。

吳草廬先生贊

紫氣蟬聯。神物蜿蜒。有開必先。山川降神。自元而貞。篤生哲人。慎斯勤斯。絕乎等夷。於道早知。厲如秋霜。煦如春陽。何德之昌。抱膝而居。氣蓋八區。闕而弗舒。玩心神明。操觚弗停。與衛聖經。學徒是依。毛之有麒。甲之有龜。刺其淵冲。以消吝封。心熙氣融。聖王當軒。留聘益尊。施教成均。北許南吳。先後合符。人文之敷。大明太史金華宋濂贊。

虞文靖公像贊

朱明之墟。離火降精也。丹鳥雛樞。爲駕綵駟也。手握化樞。人文昭明也。補帝袞衣。五色煢煢也。上凌霄漢。下燭九溟也。無幽不啓。無芳不榮也。頓挫萬彙。配合三靈也。獨騎元氣。棲神窈冥也。之死弗沒。隨物流形也。疑爲喬雲。燦爲德星也。璇琬所勒。鬼祕神局也。命世之材。一代之英也。

先師內翰柳公眞贊

偉貌長身。端嚴若神。卽而就之。煦然春溫。海闊天高。莫窺覘其宏度。霆奔飈豎。豈驅駕乎雄文。來趨踰之。袞佩作儀。表於薦紳。出入容臺。振百年之禮樂。昭宣帝制。煥大號於乾坤。惟其具該博崇深之學。所以繼光明俊偉之倫。仰瞻遺像。有涕沾巾。儻使泉臺之可作。庶幾士俗之還淳。門人具官宋濂拜讚。

吳山長像贊

原道書院山長吳履予之異姓弟也。人之評履者一則曰履善屬文其嚴簡嶄絕處類秦漢閒人語迫而視之有光淵然也。一則曰履自幼沈酣義獻中行草書皆入妙品如寶劍舞空光芒疊發芙蓉出水態有餘妍當與鮮于太常齊驅其得意者或謂過之其知履僅若此至其尙風義赴友朋之急不顧水火雖古人猶難之者未必能知履也因贊之以白履行於世贊曰

若人者其古君子之徒與聞人急難即欲赴之力縱不及心懸懸其如饑水火在前幾若弗知輾轉不寐而長夜以思世滔滔而莫察吾獨探其隱微彼以藝文爲矜衒者其相知也不亦淺而若人者其古君子之徒與

石巖凌先生像贊

冰霜顏面鐵石心腸持斧七閩百壬斂藏神明之政淵源之學其人雖亡清風猶昨

溟滓生贊有序

溟滓生者盱江廖應淮海學也抱負奇氣好研摩運世推移及方技諸家學年三十游杭上疏言丁大全誤國狀大全怒中以法配漢陽軍生荷校行歌出都門道傍觀者嘖嘖壯之抵漢江濱遇蜀道士杜可大揖曰子非廖應淮耶生愕然曰道士何自知之大可曰宇宙大虛一塵爾人生其閒爲塵幾何是茫茫者尙了然心目閒矧吾子耶然自邵堯夫以先天學授王豫天悅天悅死無所授同葬玉枕中未百年而吳曦叛盜發其冢得皇極經世體要一篇內外觀象數十篇余賄盜得之今餘五十年數當授子吾俟子亦

久矣。乃言於上官。脫其籍。盡教以冢中書。其算絲聲音起。生神鑒穎利。可大指畫未到者。生已先意逆悟。可大自以爲不及。學旣成。去隱宜。歛閒。遇余安裕弋陽。將教之。安裕勸生業中庸。生瞠目厲聲曰。俗儒幾辱吾康節於地下矣。復去之杭。客賀外史家。晝市大衍數。夜沽酒痛飲。飲卽吐。吐卽飲。不醉如泥。弗休。醉中嘗大叫曰。天非宋。地非宋。地。奈何。奈何。語聞。賈似道遣客叩之。生曰。毋多言。浙水西地。髮白時。是其祥也。似道未解。復召至。屏人與語。生曰。明公宜自愛。不久。宋鼎移矣。似道惡其言。掩耳走。生亦徑出。過曾淵子家。索酒轟飲。酒酣。作嬰兒啼曰。大廈將焚。燕猶呢喃未已耶。復賦歌以見意。都人士聞之。競指以爲怪民。不與接。獨太學生熊賂聖。猶時造其廬。生私執熊手。謂曰。吾端居曾樓。聞空中戎馬百萬來。人鬼作哭泣聲。壬申。襄樊陷。甲戌。宮車晏駕。乙亥。長江飛渡。似道亦殛死。臨漳。丙子。三宮播遷。諸王大臣皆南北亂走。噓吸事耳。子不去。欲何爲。居亡何。宋事日非。沿江州郡。望風奔潰。生大慟曰。殺氣又入閩。廣中。吾不知死所矣。遂遁去。其言無一不驗。後四年。病死。處州學中。年五十二。無子。唯一義女從之。生宗堯夫。先天之學。頗自謂知易。每見諸易師傳疏。不問淺深。輒訛駁以爲樂。及論後天。則尊義。畫爲經。象爻繫辭。爲傳。黜文言象象二傳。爲九師之言。且謂說卦非聖筆。不能作。上下繫乃門人所述。序卦直漢儒記爾。蓋生聰明絕人。未聞道而驟語數。故其論經多失中。然性使酒難近。又好評人陰私。人面頸發赤。不願罕有從其學者。唯國子簿吳浚。進士彭復。樂師之浚。不卒業。復屢受唾斥。不怨。生將遁時。召復至。口發例。手布籌。雖平昔所靳。若終身不示人者。一舉授復。復後又授鄱陽傅立云。或曰。生瀕死語女曰。吾死後一月。中朝命。

山姓鳥名使者來徵吾及傅立。立當過予門。汝可出藏書示之。立當以此致大官。後皆如其言。所謂山姓鳥名。崔鵬飛也。生所著書有元元集。歷髓。星野指南。象喻統會。聲譜。畫前妙用。數十萬言。今猶閒傳於世。贊曰。

龍圖成章。有文從衡。以濬以明。以洩其藏。以奠乎元黃。昔我素王。韋編三絕。墜緒微茫。誰其我綴。我參我腴。九師襄之。我苞我晶。百氏攘之。如河之渾。如噎而昏。如治絲以棼。天未降割。一髮攸存。維洛有士。居於百原。超神沖漠。凝於晝先。數往知來。小大斯甄。莫峻匪匡。我陟其顛。莫深匪淵。我淪其泉。簡材以畀。非隱弗傳。有冥者冢。卒昭以宣。或得其牘。載神於言。炎炎宋錄。維其訖矣。長星蝕柳。色之赤矣。眚祥見徵。土髮飂矣。朋昏以世。莫之感矣。魚在在驚。尙其息矣。維生之知。中如沸羹。彼憐弗知。覆謂我狂。我狂如何。我憂孔多。我山我河。我用弗磨。俾淪胥以訛。我酒既嘉。我瑟又和。我寧不嘯歌。北風其涼。旂旐央央。我車龐龐。蕩蕩江流。杭之如陸。有腥其穢。流血沃沃。海氛方殷。其何能目。人有恆言。風雨漂搖。夏宇障之。涉於大川。烝徒楫之。楫副字橈。子子焉依。國武斯墜。不知攸戒。日隕弗升。雖晝作夜。鴞舞於林。鬼瞰於舍。孰投是艱。曾莫之艾。乃怒乃驚。乃瞻乃行。乃遯死於冥。陸生之爲胡。乃神以著。徵之古聖。匪程伊度。何以言之。卒淪於數。一曲之淹。不通其故。易道既泯。數亦不類。激贊於生。發我長喙。月出皎兮。在天之心。在天之心。何古何今。

余自幼卽見長老談溟洋生事。近見李淦性學及咸光子實所造文。又知生爲詳。以生之精藝如此。而

修宋史者不列之方技傳中。殊可恨也。故予駁之。特序之。又傷易道之微。激而贊之。惜乎予文蕪陋。不能永生也。然予情亦至矣。濂志。

采苓子贊

榮陽鄭仲德有隱操。嘗采苓九藍山閒。因自號采苓子。斯贊之所由作也。贊曰。彼采芝者。肥遯之士。皦皦霞外。不容纖滓。白月入懷。涼颼沂櫃。高視一世。何慮何營。

匡山居士真贊

紫眼有稜。足以洞視千古。長髯如戟。足以畏讐百壬。或建大將鼓旗。而殄殲於妖沴。或被處士冠服。而容與於雲林。可顯可晦。載浮載沈。壹委順於外物。初無累於貞襟。縣千尋之丹厓。莫踰其峻。瀦萬仞之重淵。罔測其深。抱忠義之志。而耿耿自信。所謂不變不改。若百鍊之精金者邪。

曾侍郎像贊

身形之瘦弱也。則山澤之臞。精神之凌厲也。則列仙之儒。博極諸書。而守之則約。智周羣類。而處之若愚。當議禮而考文。較損益於錙銖。稽百王之軼典。翼一代之鴻圖。豈非養德之腴。造道之樞。而爲國之耆艾。邦之著龜者乎。

章判官像贊

唐福州軍事判官章公修實。檢校太傅仔鈞之父也。其遺像至今蓋四百餘年矣。二十世孫御史中丞滋。

偶於閩中購得之。如獲至寶。持以示其友宋濂。因爲作贊。贊曰。器局深沈。容儀嚴肅。吁嗟哲人。如金如玉。餘慶所被。孫子若雲。重珪疊組。至今揚芬。

四十二代天師張公像贊

舍冲葆虛。執眞之樞。翊度宣靈。契道之符。龍虎衛乎左右。風霆屬於指呼。此古之博大真人。而今之列仙之儒者邪。

趙使君像贊

宋之王孫。元之循吏。才優識明。政通民治。未老而歸。臨難不貳。懦夫觀之。可以作氣。

趙子昂像贊

文運中微。頽波日靡。公起東南。作天一柱。天人之表。帝王之孫。麟游鳳翔。珠明璧溫。歷試中外。遂居禁密。其名之升。與日同出。彼儉邪者。腐鼠敗豚。何能病公。臭穢自聞。三百年閒。西東萬里。雄鳴一代。如公者幾。公貌如玉。公文如金。變化莫測。照耀古今。

李太白像贊

元行臺治書侍御史。亦憐眞班所藏李太白像。係祕閣傳本。吾友危君太樸嘗爲之贊。自後流落於金陵。駱氏酒家。洪武己酉秋。郡士王宗溥購獲之。尋以摹本見貺。因造贊曰。

長庚降精。下爲列仙。凌厲日月。呼噏風烟。錦衣玉顏。揮毫帝前。氣吞閣豎。視若烏鳶。頓挫萬象。隨機回旋。

金童來迎絳節翠爐下土穢濁孰堪後先飄然一笑騎鯨上天

傅同虛像贊

將求子於外兮則鍊精於三田欲索君於內兮則游神乎八天是皆窺見夫粗迹而未能暢達其真玄高岑兮谷綿白鶴舞兮躡躡豈非長跨於洞庭之野吹瓊管而招飛仙者耶

宜春夏都事遺像贊

以忠字尚之

其才孔良其氣則剛沈潛乎仁義之府嚙嚙乎禮樂之場窮春秋而寓袞斧法菽粟以爲辭章使之專城而居則可以攀次公之黃使之入直鑾坡則可追文成之張胡爲乎低回下列莫展一長託使車以遐覽竟仙遊於五羊豈詘於人者難知而信於天者不亡後千百年剛風鬱滂當見騎麒麟而下大荒者耶

元英處士方公遺像贊

予學子方孝孺元英處士之諸孫也持處士像來請贊贊曰

振騷雅於江南混漁樵於玉笥諫垣天近雖屢形州牧之童牛衣夜寒終不奪烟霞之志凜然亢直之風可折諂諛之氣遵真曜之遺則造元英之私諡唯其畜厚而發弘所以繼隆而傳熾紳笏蟬聯勳庸赫著蔓延閩浙之間莫匪雲原之裔敢申贊辭式昭瞻企

王宗普像贊

以子爲貴介公子耶何其神清氣和無綺紈之態也以子爲仙翁釋氏耶何其與時俯仰遊乎方之內也

以子爲詩人韻士耶。何其清奇勁直。訥然而謙退也。然則果何爲者耶。蓋跡混乎三者之中。而心游乎埃壚之外。此吾嘗謂空同子以古之人而處乎今之世也。

危雲林像贊

文繼虞、歐之盛。位居廊廟之尊。天下譽之而不爲喜。衆人毀之而若無聞。此公所以爲大雅之君子。傳百世而長存者乎。

王指揮像贊

真人龍興。山川降精。仗劍來從。莫非豪英。維時王公。實將家子。虎吼鷹揚。萬夫披靡。成功錫爵。遂鎮一方。弛其武威。佩玉冠裳。何以觀之。有煒其像。益懋厥勛。配古良將。

蘇郡事伯夔像贊

子由後
平仲父

才足以行志。智足以成事也。苟盡施於時。必有大過於人。而得位以行者。僅出其一二也。年齒之高。林泉之趣。皆公之所宜有。固天報善人之所致也。惟有子之甚賢。以文鳴於治世。足以繼絕學於前人。揚休聞於不墜也。此吾嘗私爲之善。誦長公之言。擬公於晁氏之君成。而知其無愧也。

自題畫像贊

廣陵孫生貌予真。人皆失笑。謂無不似者。因題其右。辭曰。似柔而強。如愚而明。辨駁百氏。寤寐羣經。千載之長。一世之短。前武儼然。吾敢不踐。

又

吾心與天地同大。吾性與聖賢同貴。柰之何。隨於曲學。局乎文藝。忘其真實之歸。溺此浮華之麗。顛隳於得喪之塗。眩惑於是非之際。縱濫厠於大方。曾不離夫小智。靜言思之。幾欲實涕。奮自今以爲始。日載惕而再厲。有如升嶽者。當極於崇巔。辟若改火者。須資夫新燧。期融通於高朗。誓薶治其蕪穢。用致知爲進學之方。藉持敬爲涵養之地。續墜緒之茫茫。昭遺經之晰晰。雖任重道遠。必篤行而深詣。庶幾七尺之軀。不負兩閒之愧。爾其勉旃。以終厥志。

越國夫人練氏像贊

有序

天地之大德曰生。夫生者乃天地之心。雖陰陽之所運行。有開闔慘舒之不齊。然天地之心。生生而弗息者。恆循環於無窮。有如碩果不食。則其生道已具其中。俟時發榮。挺然而莫之遏矣。時至五代。用兵爭強。屠戮逮乎雞犬。是天下極亂之時。蓋無復人道。有能於其閒。不爲氣運之所變遷。而一念之仁。有以契夫生生不息之心。則其感召之速。所以敷遺於後人者。其澤曷有旣哉。閩之練夫人諱鶴。建州刺史章公仔鈞之妻也。生而肉髮深沈。而端毅終日。或不一笑言。且知識有絕人者。時閩王命公屯兵浦城之西巖。南唐盧將軍帥師來侵我。公遣二校請師於州。失期。將斬之。夫人勸曰。時危民未靖。公柰何。斬壯士公悟。不問。二校逸入南唐。皆爲大將。一則金陵邊鎬。一則上元王建封也。保大三年二月。南唐遣江西撫安使查

已久。獨夫人猶存。二校遣使者持金帛遣夫人。并以一白旗授之。曰。吾且屠城。夫人宜植旗於門。吾已戒士卒勿犯矣。夫人反其金帛并旗。弗受。曰。君幸思舊德。願全此城。必欲屠之。吾家與衆俱死耳。不能獨生也。二校感其言。遂止。夫人之子一十五人。孫六十八人。多躋顯仕。而其後人繩繩相繼。位宰執。登法從。歷卿監。佩守令之章者。殆百餘人。嗚呼。何其盛哉。非夫人有以契夫天地生生不息之心。則其施報之厚。未必若此之至也。原夫人之心。渾廓昭融。不限封域。視一城之生聚。不翅如一家。真有所謂仁者之量。歿慶以類。大易之旨也。夫人之後。其有不蕃昌者乎。其有不絢著者乎。昧者不知天之未定。謂爲善無足倚。是則天之生生之道絕矣。夫奚可哉。夫人二十世孫存道。以遺像求予贊。予旣質諸傳記。以序夫人之事。而復爲之贊曰。

懿彼夫人。生於七閩。肉髮有倫。靜毅而莊。動循厥常。女士之良。笄而有歸。建州之妻。其德與齊。建州桓桓。旗旄繚繚。以扼建關。將固我城。必集我兵。移書以徵。二校言旋。何期之愆。絕首以懸。夫人曰。吁。乾坤創夷。壯士勿誅。逸之使奔。遂爲唐臣。建旆而軍。爭城以攻。火旗晝紅。陷其四封。二校有云。使鬼爲人。夫人之仁。曷其報之。曷彙我私。曷授我旗。旗植於家。有突而譁。我劍之加。夫人曰。吁。是城卒屠。我生何爲。有衆若林。昔而斧礪。今而謳吟。夫人之亡。其魄已藏。其澤愈滂。傳紫襲龜。霧滃雲迷。被於今茲。遺像儼然。萬目斯瞻。曷取則焉。

黃氏三壽圖贊

浦陽合
溪人

賚善

身安而家裕者。人之所欲也。藏智不用而厚重有餘者。天之所福也。君有以契乎天。故不求而自足也。超乎寵辱。離乎毀譽。而游乎物表。此人之所難能。而君之所獨也。

賚深

智足以燭理。而加之好學。敏足以蒞事。而本於無私。事長不以和樂勝禮。取下不以慈惠傷威。行乎家庭。春溫而秋肅。著乎言行。方矩而圓規。斯學者之所難能。苟謂之篤行君子。其孰以爲非耶。

賚文

人知其外之偉。而不知其內之美。知其才之豐。而不知行之崇。是蓋質而不二。和而有禮。介而能通者也。

龍馬贊有序

西南域自昔出良馬。而產於羅鬼國者尤良。或云羅鬼疑卽古之鬼方。其地有養龍坑。在兩山之中。泓渟齋深。開闔靈氣。而蛟龍實藏其下。當春日始和。物情酣鬯。土人立柳阮畔。擇牝馬之貞者繫之。已而雲霧晦冥。咫尺不能辨色。類有物蜿蜒。上與馬接。蓋龍云。逮天色開霽。視馬傍之沙。有龍跡者。則與龍遇。謹其芻葷而節宜之。暨產必獲龍駒焉。粵若洪武四年六月壬寅。夏國主明昇以全蜀降。獻良馬凡十。而其一色正白。乃得之於阮者。身長十有一尺。首高九尺。足之高比首而殺其二尺。有肉隱起項下。約厚五分。廣三寸餘。貫膺絡腹。至尾閭而止。精彩明晃。振鬣一鳴。萬馬爲之辟易。韉勒不可近。近輒作人立而吼。上謂

天既生此英物。必有神以司之。親撰祝策。詔有司以牲牢祀於馬祖。然後勅典牧副使臣高敬囊沙四百斤。壓之人跨囊上。使其游行苑中。久之。性漸柔馴。適八月癸巳。上將行夕月之禮於清涼山壇上。於是乘之而出。如躡雲而馳。一塵弗驚。皇情悅豫。賜其名爲飛越峯。復命御用監直長臣馬晉臣繪其真形藏焉。臣濂稽諸載籍。漢之元鼎中有神馬出渥洼水中。馬之生於水者尙矣。養龍之說。雖相傳於外國。要當可徵不誣也。肆惟皇上以大德而位大寶。日之所出。日之所沒。無不梯山航海。獻寶奉琛。邇者獨角之犀。來自九真。食火之雞。貢於三佛齊之境。其他僂形僂狀。藉藉紛紛。且不一而足。而況茲水產之龍馬乎。周書有云。不寶遠物。則遠人格。所寶惟賢。則邇人安。皇上宵衣旰食。日懷保於小民。巖穴之士。蒐羅殆盡。將圖治安如黃虞時。其遐荒殊裔。珍毓奇產。未嘗有心求之。所以榮光休氣。洋溢中國。仁聲義聞。充洽八表。而龍媒之異。自致於天閑十二之中。揆之於書。前聖後聖。蓋同一軌轍也。其視貳師之遣。黷武窮兵。以索諸大宛者。果爲何如哉。臣濂以文字爲職業。際茲盛美。不敢默而無言。謹述贊辭一首。以貽諸後世。贊曰。天駟燄蛟。龍升靈泓。澄神馬生。祥颺瑞鶴。晝杳冥天。一翕聚通精靈。龍胡盈。鳧臆輕。竹披耳。鏡懸睛。花雪捲毛光。照夜汗溝有血霞。流頰振鬣鳴。萬馬驚。閃流電。逐飛星。九霄彷彿從龍行。但聞瀟瀟風雨聲。三川平。八極寧。真龍媒。獻龍廷。出入天門。駕龍駟。太霞五彩滿瑤京。皇風清。皇道貞。皇威明。茫茫堪輿內。孰敢不來庭。陋彼漢將軍。空圍貳師城。乃知天子在樹德。不必連年徒用兵。

墨鞠圖贊

建安蘇照爲學子黃叔暘作墨鞫圖。侑之以竹石。豈以其氣節之相同歟。禁林散吏宋濂爲造贊曰。我本中黃。鐵爲肺腸。精神外章。不自知形貌之黜歟。綠竹猗猗。白石瑳瑳。貞而匪阿。斯爲月下之友歟。萬色齊冥。洞察物情。雖暗而明。豈陶令沈昏而託之酒歟。

陳方都督像贊

桓桓俊英。矯矯虎臣。心雄萬夫。才佚三軍。爵列崇階。功在盟府。圖像雲臺。流芳千古。

李徵君像贊

嗜義親賢。以道自娛。懿哉若人。君子之儒。

虎林處士贊

虎林處士王君。年踰七十。而視聽如少壯時。其孫監察御史驥。從予受經者久。閒來請贊。贊曰。素髮垂垂。中心熙熙。儉勤作肥家之本。嚴厲爲馭衆之基。好施之仁。久而彌篤。嫉惡之氣。老而不衰。吹鳳簫於明月之夜。飛羽觴於百花之時。太布寬衣。容與委蛇。不知者謬稱虎林處士。知之者以爲瓊臺之神仙乎而。

華嚴經贊序

上人幻滅。嚴持梵行。欲求無上真如之道。嘗自念言。華嚴大經。實中天調御第一時所說。一乘頓教。化爲尊勝。欲燕松爲煤。入以香藥。搗和成劑。以書此經。而彼松煤者。假物所就。具黑暗相。有染白法。欲煨汞爲

丹承以空露。研潤如法。以書此經。而彼汞丹者。炫耀可觀。能育人自非助道者。欲推赤金素銀。廉薄如紙。復粉爲滄。以書此經。而彼金若銀。雖曰重寶。外塵爲體。初不自內。以是思惟。身外諸物。若勝若劣。若非勝非劣。若一若多。若非一非多。皆不足以稱此殊利。繼我一身。內而心膂肺肝。外而毛髮膚爪。資血以生。資血以成。資血以長。資血以至壯老暨死。是則諸血。衆生甚愛。如梵摩尼一滴之微。莫肯捨者。我今誓發弘願。於世尊前。以所難捨。而作佛事。從十指端。刺出鮮丹。盛於清淨器中。養以溫火。澄去白液。取其真純。蘸以霜毫。志心繕寫。滿八十卷。尊開益壽禪居。昔者樂法比丘。當無物時。欲聞佛語。了不能得。乃信婆羅門言。以皮爲紙。以骨爲華。以血爲墨。願書一偈。況今百千妙頌。十萬正文。不止於一縱捐軀命。以報佛恩。無足爲異。於血何吝。唯願法界有情。或見或聞。證入雜華藏海。證入雜華藏海已。卽得六根清淨。得六根清淨已。卽得自性清淨。得自性清淨已。卽得四天下微塵刹土中一切衆生。皆悉清淨。無相居士未出母胎。母夢異僧手寫是經。來謂母曰。吾乃求明延壽。宜假一室。以終此卷。母夢覺已。居士卽生。今逢勝因。頓憶前事。於是親燻五分妙香。香雲輪囷。結爲寶網。徧覆經上。乃復合爪向佛。散華作禮。而稱贊曰。雜華淨智海。九會之所說。一音所演唱。十處放光明。信解行證門。總攝無復餘。如是具五周。如是辨六相。如是分十元。妙義皆充足。以至四法界。二十重華藏。無邊香水海。教條有差別。性相了無礙。圓融與行布。非異亦非同。一可爲無量。無量亦爲一。重重無有盡。是爲功德聚。如來最上乘。龍宮所祕藏。上人出身血。嚴飭書此經。於一滴中。普含十方界。於一一界中。普現光明臺。於一一臺中。普成獅子座。於一一座中。

普見分身佛。如上無數佛。皆具大威德。眉閒白毫光。徧滿一切處。共宣大乘法。聞者應解脫。譬如日月生。照三千大千。悉見種種色。法能破暗故。譬如大洋海。波平乃如掌。無丘陵堆阜。法能平等故。譬如陽春至。大地盡發生。諸根各萌芽。法能霑溉故。譬如梵志夢。一夢千劫事。不過利那門。法能融攝故。譬如子憶母。未見心已至。形神皆兩忘。法能無離故。譬如黃金色。金色不相分。金亡卽色空。法能不二故。譬如石性堅。初不從外得。石性自圓滿。法無修證故。能如斯見解。見經不見血。若加精進力。見佛不見經。及至成道已。見性不見佛。我性如虛空。了無能見者。無見中有見。全體卽呈露。苟執於所見。亦非我本性。見見二俱泯。此爲真見見。真見復何有。性本無物故。一心歸命禮。祇夜以爲贊。諸妙樓閣門。彈指一時啓。

大遼龍虎丹贊有序

龍虎丹贊。爲予友鄭源氏作。源因讀金碧古文龍虎上經。有悟大遼之旨。用之修練。節節有奇驗。復以其圖秘也。請予白之。作是贊。贊凡四章。

苞乾靈一

人身苞精氣。妙與元化并。一神管攝之。鉛汞各流行。神所棲止處。實爲天地中。闔闢類兩扉。循環不竭窮。廓然含沖虛。獨立不以形。是卽真息根。強名帝乙庭。靜極必自顯。內境垂白芒。或想爲連環。無乃喪其常。

斡化紐二

凝神入紫虛。沖然抱一居。青龍鬱上升。白虎爲熬樞。牝牡旣相從。蒸潤如流酥。鄴鄂一以固。溫養成子珠。

銷寶離中陰。坎陽復來隨。純剛號爲乾。潛躍契道符。鬱羅蕭臺中。服霞漱雲腴。閱歷無窮年。永共溟滓俱。

考火記三

鼎爐乾坤樞。匡郭水火魂。戊巳居土官。一氣中夜存。火候十二時。暮蒙復朝屯。專氣而致柔。綿綿日相因。刑德務並進。文武須錯陳。薰蒸洽太和。天機益神津。三元與王氣。一一返其根。後天不能彫。長爲萬象尊。

稽曲徵四

三千六百門。盡隨魍魎場。雌雄鑄爲劍。日月吸光晶。尾閭閉元液。九鼎運女英。三遜及五假。八石巧煎烹。如此之舉措。難可一二名。陰魔奪人命。遺屍莽縱橫。寒飈動羅鄩。時有鬼嘯聲。方知涉有爲。不可學長生。

觀音石贊

虎林翁君祥卿得圓石一大可五六寸。上現圓通大士妙嚴寶相。坐寶蓮華。善財童子合爪侍側。蓋大士住不可思議解脫門。能以神變作諸佛事。攝受衆生。大則示化真身於陀怛洛迦山。小則寄影像於一木一石。不假人爲。自然天造。無非自慈愍中發現。祥卿因請濂作贊以顯神功。以示闡提生我慢者。贊曰。元黃旣肇分。白石卽受質。斯時未有佛。云何能應現。千劫皆佛化。難以時節拘。劫初與劫終。常居寂光土。石本無情物。其頑無與等。初無感通者。云何佛示像。微塵刹土中。塵塵皆是佛。有情與無情。本來同一體。諸佛亦無數。動曰那由他。云何圓通佛。獨此示神變。圓通於支那。夙有大因緣。所以不會捨。如母之憶子。如來談諸相。皆是虛妄集。云何自着相。曷以釋迷網。由相以悟性。正如指指月。見月指則忘。寧有繫執故。

以此四者觀。唯知佛願弘。聖凡盡融攝。調御菩提心。假石顯云異。超出思慮表。既非圖繪力。又匪鑄勒功。
幻成妙嚴相。七寶作瓔珞。瞑目結跏坐。正以慈愍故。用警闡提者。徒爾增我慢。當知神通力。乃復有斯事。
始悔未見時。口出不淨語。如仰首唾天。唾還着面故。愚癡誠可念。寧忍加斥逐。我願大地人。無不知三依。
見石非見石。見佛亦非佛。但見無量光。各自心中發。徧照十方界。明如日月燈。十方諸品類。盡得諸佛智。

